

WANTOK

NIUSPEPA BILONG YUMI OL PAPUA NIUGINI STRET! 30 YIA NAU

32 pes

Namba 1,365

Wik i stat long Fonde Ogas 24, 2000

70t

**Provinsel Gavman
bai lukautim ol
ples balus**
pes 2

**Ol ripot bilong
palamen**
pes 3

**Sir Pita
Ialkim rais
long Maprik**
pes 5

**SAPLIMEN
Wokim haus**
pes 22

**Supa Fan
spesel**
pes 20 na 21

Lo bilong ol Politikel Pati na Kendidet bai kamap

LONG kamapim strongpela gavman na strongpela na gutpela politikel pati sistem long Papua Niugini, Praim Minista Sir Mekere Morauta, i autim tingting bilong Gavman long Palamen aste long senisim Mama Lo bilong ol Politikel Pati na Kendidet.

Em i tok dispela lo bai bringim bikpela invesmen long kantri long ol yia i kam bihain long PNG i bin kisim independens long las 25 yia.

"Dispela pasin bilong stretim lo i opim rot bilong kamapim ol we bilong karim aut ol politikel rifom na strongpela gavman yumi mas gat long lukim ol trupela developmen i kamap long kantri bilong yumi," Sir Mekere i tok.

Sir Mekere i tok lo bilong Politikel Pati na Kendidet we i stap nau i gutpela tasol i no strong tumas. Em i tok long dispela as, kantri i wok long bungim planti hevi, ol wok developmen i no go het, na ol pipel i no kisim olgeta gutpela samting long planti ol samting PNG i gat.

Em i tok ol ekonomik na sosel ripot i soim olsem PNG i no kisim gutpela sevis long sait bilong helt na edukesen insait long las 25 yia.

Sir Mekere i tok tu olsem ol politisen i no givim bel, laik na tingting bilong developim kantri. Olsem na em i tok dispela lo bilong senisim Mama Lo bilong ol pati na kendidet em ansa bilong krai bilong ol pipel bilong PNG.

Em i tok dispela bil em i laikim Palame i pasim, i lukluk long Ogenik Lo long karim aut Sabdivisen VI.2.H bilong Mama Lo em long lukautim ol ileksen na lukautim ol kendidet bai ol ausait lain i noken baim ol, kalabusim ol, ol pretim ol long inapim lain bilong ol ausait lain.

Sir Mekere i tok dispela bil i karamapim tu pasin bilong ol pati na kendidet i kisim mani long resis long ileksen o ronim pati.

Em i tok taim i nogat gutpela na strongpela pati sistem, dispela i

mekim gavman i save senis klostu klostu na i no kamapim gutpela gavman. Dispela i save kamapim hevi long ekonomik na sosel developmen.

Em i tok dispela bil i givim tok orait long ol ausait lain i givim mani long ol politikel pati. Long dispela rot ol pati bai lukautim gut mani bilong ol na ol pablik bai save long pati i yusim mani bilong ol olsem wanem.

Sir Mekere i tok dispela nupela lo bai askim ol pati long givim ripot bilong mani bilong pati i go long ol atoriti olsem Ombudsmen Komisen, ol dona na ol arapela pati na kendidet.

Em i tok i gat lo i tok long amas mani ol ausait lain i ken putim mani i go long pati na sapos ol i brukim lo i gat mekim save bilong dispela.

Sir Mekere i tok Ogenik Lo i tok tu olsem Gavman bai katim mani insait long Nesenel Baset long givim wan wan memba bilong ol politikel pati na tu givim mani long strongim ol politikel pati.

Em i tok Gavman i luksave olsem PNG i nogat ol strongpela politikel pati na olsem i gat wok bilong kamapim ol strongpela politikel pati.

Sir Mekere i tok dispela lo i tok orait long Gavman i givim mani long ol meri long sanap long ileksen na moa yet long ol pati long sapatim ol meri.

Em i tok dispela lo bai banisim sampela pasin bilong ol independen memba, olsem long taim bilong votim praim minista.

Sir Mekere i tok dispela lo i tokaut tu long pasin bilong votim praim minista na pasin bilong holim vot i nogat bilip, vot long ol Mama Lo na vot long nesenel baset.

Em i tok dispela bil i kamapim tu lo bilong rejisterim o rausim ol politikel pati. Em i olsem ol pati i rejista tasol i ken nominetim ol kendidet long resis long ileksen na kisim pablik mani.



• Baua Baua tieta grup bilong Is Sepik provins i mekim wanpela kempen pilai long stapim pasin bilong bagarapim ol meri, ol pikinini, famili na sosaiti. Ol i laik skulim ol pikinini groa wantaim gutpela pasin na sindaun insait long komyuniti. Foto: IVAN BAYAGAU.

Karani stapim pipel long baim gan

**WENCESLAUS MAGUN
i raitim**

PLIS Minista Mathias Karani i stapim ol pipel long baim ol sotgan, pistol, na strongpela masin gan stat long Tunde long dispela wik i go inap long wanem de na taim em bai tokaut long givim tok orait gen long ol pipel i ken baim gan.

Mista Karani i tok disisen em i mekim i kam aninit long Seksen 79 (1) bilong Paiaam Ekt Sapta 310 long givim toksave long ol gan na ol katres.

Em i tok dispela tambu long sampela taim i go long ol gan na katres i kam aninit long Seksen 5A (1) bilong Paiaam Ekt Sapta 310 long givim nupela pemit i go long ol sotgan, pistol, na ol strongpela masin gan.

Em i tok tu olsem disisen em i mekim i bihainim komitmen bilong Nesenel Gavman bikos long hevi bilong Lo na Oda long Papua Niugini, na tu sapat i kam long Praim Minista Sir Mekere Morauta, ol bisnis komyuniti na olgeta pipel.

Mista Karani i tok pasin bilong ol man i yusim gan long holim pas ol manmeri, repim, kilim, stilim na

mekim ol bikpela trabel i bin go antap tru bihain long independens de Septemba 16, 1975.

Em i tok long dispela as planti ol nupela bisnis lain na ol lain i gat laik long kam mekim invesmen long kantri i bin go daun.

Mista Karani i tok planti ol gan husat ol lain i gat laisens na i kisim nau i stap long han bilong ol raskol husat i wok long bagarapim gutpela sindaun bilong ol pipel.

Em i tok ol plis bai stat long kisim gan na katres long ol lain i nogat laisens, na plis i no inap sasim ol lain i givim gan o katres bilong ol long ol plis.

**Nestlé
MILO** IKEN WOKIM GUTPELA SAMTING LONG YU

Palamen nius wantaim WENCESLAUS MAGUN

Stettin Be Lamba Kampani bai statim daunstrim wok

STETTIN Be Lamba Kampani, wanpela timba kampani bilong Gavman bilong Japan i no pasim wok long Wes Niu Briten, tasol ol i go insait long daunstrim wok, Minista bilong Fores, Michael Ogio i tok.

Mista Ogio i tokaut long dispela taim em i bekim sampela askim bilong Memba bilong Madang, Jacob Wama, long wok bilong dispela kampani.

Mista Ogio i tok Stettin Be Lamba Kampani i gat spesel agrimen wantaim Gavman bilong PNG long wanem dispela kam-

pani em bisnis bilong Gavman bilong Japan.

Em i tok dispela kampani i no pasim wok bilong ol. Nogat. Ol i senisim pasin bilong wok na i go insait long daunstrim prosesing.

Mista Ogio i tok bipo dispela kampani i save katim diwai na salim i go ovasis tasol nau ol i go insait long daunstrim prosesing. Long sait bilong kampani i no baim pinis pe long sampela ol wokman, Mista Ogio i tok em i samting bilong Leba Dipatmen long glasim dispela hevi na stre-tim.

'Nogat wanpela pablik sevis na administretiv straksa,' Embel i tok

MINISTA bilong Pablik Sevis, Philemon Embel i tokim Palamen astu olsem pablik sevis na administresen straksa aninit long nupela rifom sistem i no wok gut long kantri tude bikos i gat planti hevi i stap yet.

Wanpela bilong ol dispela bikpela hevi em i olsem dipatmen bilong em i no kamapim wanpela pablik sevis na administretiv straksa we olgeta provinseel gavman long kantri i mas bihainim.

Em i tokaut long dispela taim em i bekim sampela askim bilong Gavana bilong Enga, Peter Ipatas.

Mista Embel i tok rifom bai wok sapos i gat gupela administresen na ol lo i stap bilong karim aut wok.



TOKSAVE

AusAID, husat i save makim Australia long helpim ol arapela kantri, i mangalim stret ol senses wokmanmeri bilong Papua Niugini.

"Planti bilong ol i nogat 2-wei reidio long helpim ol taim ol i wok long bikbus tru long taim bilong 2000 Nesenel Populeisen Senses tasol ol i mekim gut wok bilong ol." Mista Alex McNaughton o Meknoten, wanpela AusAID senses man; i tok long Pot Mosbi.

Mista McNaughton i wok olsem teknikel advaisa wantaim NSO o Nesenel Stetistikel Opis long stretim wok bilong 2000 Nesenel Populeisen Senses. Senses em i wok bilong NSO. Mista McNaughton bai go bek long Australia long neks Fraide Septemba 1.

Em i tok olsem planti ol senses wokmanmeri i no bin skul gut long mekim wok bilong senses.

Ol samting bilong skulim ol i bin kamap leit tasol ol distrik na ol lokol gavman senses kodineita i bin lainim ol gut long wei bilong wok na i nogat samting rong long senses. Mista McNaughton i tok.

Em i bin mekim ol dispela toktok taim em i bin givim ripot bilong em i go long Senses Direkta Mista John Kalamoroh

Las wik, Mista McNaughton i bin raun i go long Westen Hailans. Simbu na Isten Hailans long skelim ol lukluk long wanem kain hevi ol senses wokmanmeri i bin painim long taim bilong senses.

Em i bin go wantaim NSO senses opisa bilong Pot Mosbi, Mista Roko Koloma, na Mis Moale Vagikapi, wanpela meri Papua Niugini husat i wok wantaim AusAID long Pot Mosbi.

Mista Koloma i bin skulim ol senses wokmanmeri bilong Sauten Hailans long wok bilong senses na bihain em i bin wok olsem wanpela supavaisa bilong senses insait long Mendi bikpela taun na hetkwota bilong Sauten Hailans.

Em i tokim Mista Kalamoroh olsem em wantaim Mista McNaughton na Mis Vagikapi i bin kisim planti gupela tingting taim ol i bin miting wantaim ol senses wokmanmeri bilong Westen Hailans, Simbu na Isten Hailans.

Mista Koloma i tok olsem ol dispela gupela tingting bai helpim tru wei bilong wokim senses long bihain taim.

NSO is save mekim senses long olgeta 10-pela yia na senses bilong bihain bai i kamap long yia 2010

Senses em i wok bilong kauntim ol manmeri pikinini na kisim toktok bilong ol long helpim Gavman plenim gut developmen bilong kantri na developim ol ples we i nogat ol samting olsem klinpela gupela wara bilong dring na kuk, rot, bris, skul, hausik, stoa, pawa bilong lait na ol kainkain arapela samting bilong helpim ol pipel sidaun gut.

Gavman bilong Papua Niugini na Gavman bilong Australia i sapatim 2000 Nesenel Senses.

'Cyanide' no bagarapim Inaina ples na ol ples klostu, Agiwa i tok

'CYANIDE' o poisin bilong kukim gol we i bin pudaun long wanpela helikopta long Mas 21, 2000, long bus bilong Tapini, Goilala, insait long Sentrel provins, i no kamapim bikpela bagarap long Inaina wara, bus, graun na ol ples klostu, Minista bilong Envairomen na Konsevesen, Herowa Agiwa i tok.

Em i tokaut long dispela long bekim askim bilong Memba bilong Goilala, Ajax Bia, i bin askim long Palamen long mun i go pinis.

Mista Agiwa i tokim Palamen aste olsem, Dipatmen bilong Envairomen na Konsevesen i bin karim aut wanpela wok painim i go insait long bagarap dispela hevi i bin kamapim na i painim aut olsem 1000 kilogram bilong 'cyanide' i bin stap long het bilong wanpela maunten klostu long wanpela liklik han wara. Na samting olsem 100 kilogram i bin kam aut long kontena na i go insait long dispela wara.

Wok painim i bin soim olsem sampela kindam i bin dai long dispela poisin.

Tasol Mista Agiwa i tok dispela poisin i no bagarapim olgeta pis na binatang na ol wail laip bilong dispela wara.

Em i tok i gat wanpela ples, Inaina, i stap 20 kilomita long as bilong dispela liklik han wara. Tes dipatmen bilong em i mekim i soim olsem i nogat poisin long dispela wara.

Em i tok insait long 24 hawa bihain tasol long helikopta i kapsaitim 'cyanide' long bus bilong Tapini toksave i bin kisim opis bilong em.

Mista Agiwa i tok, dipatmen i tokim kampani na wanem ol trenspot dipatmen i save karim saplai bilong Tolukuma Gol main long lukautim gut ol kako taim ol i karim i go long ples bilong wok.

Long wankain taim em i tok sampela indipenden wok painim long dispela hevi i go het yet.

Gupela Gavman mas i gat gaidlain bilong yusim mani, Sir Mekere i tok

GUTPELA Gavman i mas i gat gupela gaidlain long pasin bilong yusim pablik

mani, Praim Minista Sir Mekere Morauta i tok.

Em i tok long dispela as, Gavman bilong em insait long opis bilong Ministri bilong Rurel Developmen, i kamapim sampela gaidlain we ol memba i mas bihainim long kisim K1 milien Rurel Eksen Program mani bilong ol we Wol Beng i givim long go kirapim ol bikpela infrastraksa projek long ilektoret bilong ol.

Sir Mekere i tokaut long dispela taim em i bekim sampela askim memba bilong Bulolo, Samson Napo, i bin askim long Palamen aste.

Em i tok Ministri bilong Rurel Developmen i

kamapim ol strongpela gaidlain insait long Baset na Pablik Fainens Menesmen Ekt bai ol memba i noken paulim mani pablik mani.

Sir Mekere i tok wok bilong ol memba em long salim projek proposel bilong ol bihainim ol gaidlain opis bilong Rurel Developmen i laikim. Bihain long dispela em i wok bilong Rurel Developmen opis long glasim projek proposel na putim long tenda.

Em i tok wanem kampani i winim kontrak long kirapim ol projek long proposel bilong ol bai i go mekim wok long ilektoret bilong ol.



Wanpela yangpela i soim tru danis bilong em long Katolik Yut Kalsa So long las wiken long Mosbi. Foto: IVAN BAYAGAU.

Gavman i gat Monitori na Fiskel Polisi plen bilong sekim strong bilong Kina

PRAIM Minista Sir Mekere Morauta i tok, Gavman bilong em i kamapim pinis ol Monitori na Fiskel Polisi plen bilong sekim strong bilong Kina long wol maket na holim strong pawa bilong Kina long kantri.


Sir Mekere i tokaut long dispela taim em i bekim sampela askim i kam long Ekting Oposisi Lida, Peter Peipul long Palamen aste.

"Ol prais bilong ol samting bai pudaun na i go antap. Mipela i nogat kontrol long disepia.

Tasol wok bilong mipela em long kamapim monitori na fiskel polisi long sekim na strongim strong bilong Kina," Sir Mekere i tok.

Em i tok taim gavman bilong em i tekova long gavman bilong Skato, ol i bringim strong bilong Kina i go antap na abrusim mak we olpela gavman i bin lusim pestaim.





NIUGINI AILAN NIUS



Wok long stretim ol Bogenvil rot i go het

VERONICA HATUTASI i raitim

NAMBAWAN hap long bikipela rotwok long Bogenvil we i kostim planti milien kina i pinis na nau namba tu hap bai i stat.

Long las yia, AusAID i bin katim bikipela hap mani long wokim rot long stretim rot long bikailan Bogenvil, stat long Buka i go olsme long Tinputz, Wakunai na Arawa i go olsem long Aropa, Buin, Siwai, Bana na Arawa.

Opis bilong Bogenvil Rrstoresens opis long Mosbi i tok namba wan hap long dispela bikipela frank rot i pinis. Dispela i karamapim hap rot long saut Bogenvil na i stat long Kangu, Buin na inap long Lualai.

Namba tu hap bai i stat

long Mivo Wara long Buin i go olsem long Siwai.

OPis bilong Bogenvil restoresens i tok bikos long taim nogut we bikipela ren i kamapim long saut Bogenvil, namba tu hap long wok i no stat kwiktai yet olsem ol i laikim.

Baclay Bratas kampani i bin winim kontrak long kamap olsem manesing kontrakta long karimaut ol wok long dispela rot. Na ol i givim ol liklik wok kontrak gen i go long ol asples grup long ol eria we rotwok i go long en.

Opis i tok ol komyuniti i wok long kisim gutpela samting long dispela projek taim ol yut grup i go insait long en.

Opis i tok wok long dispela rot i bin stat long las yia, tasol em i no hariap tumas bikos long taim bilong bikipela ren we i save bagarapim ol wok.

Olsem na ol i makim pinis bilong dispela yia long pinisim ol wok long dispela rot ya.

Opis i tok Saut Enjiniering, em wanpela kontrak grup bilong Buin distrik i kombain wantaim Jomik bilong Siwai na Notis Kontraksen bilong Wakunai long karimaut ol rotwok.

Opis i tok bikipela as tingting long karimaut dispela rotwok em long stretim rot long Bogenvil na sapotim sait bilong trenspot na helpim long wok bilong strongim ikononik, sosel na rihabilitesen na restoresen wok long ailan.

Opis i tok ol kodim olgeta hap rot we ol bai i brukim na givim ol asples kontrak na yut grup long wok long en.

Kangu nambis akses rot i kostim K296,660.70 na Saut

Enjinierim i wokim.

Narapela hap seksen bilong rot i stat long Buin taun inap long Santaro Pas em Saut Enjiniering i givim i go long Jomik na Not Is Kontraksen. Kos bilong dispela hap rot em K416,290.60.

Bihain long Buin/Siwai rot i pinis, ol bai skruim wok i go olsem long Bana na Jaba na Arawa.

Hap rot long Siwai i go olsem long Sovele we sil ta rot i nap long en i bagarap tru. na bikipela ren tu i bagarapim planti ol bris namel long Siwai na Nagovis.

Wantok i no bin inap long kisim ol toktok long AusAID opis na Bogenvil Provinsel gavman opis long dispela samting.

Ol elementeri skul long Siwai laikim moa sapot

TAIM ol elementeri skul long Siwai insait long sautwes Bogenvil i wok long go gut ol i laikim moa sapot i kam long ol papamama na provinsel edukesen opis.

Bikos ol i sot long ol tisa na ol metiriel bilong ol tisa na sumatin long yusim, ol i laikim helpim long dispela samting.

Em i tok hevi i stap long sait bilong mani we ol i sot long baim ol teks buk na ol arapela samting bilong yusim.

Kodineta bilong Siwai Elementeri skul Joseph Kutomai i tok moa aweanes long toktok long elementeri skul i mas kamap insait long ol komyuniti long Siwai bikos em i lukim olsem komyuniti i no givim tumas sapot olsem ol i save givim i go long ol komyuniti skul.

Mista Kutomai i tok ol komyuniti i no klia gut yet na olsem ol i no lukim ol elementeri skul olsem bikipela level bilong skul we ol pikinini bilong ol bai kisim save long en.

Em i tok long Siwai yet i gat 27 elementeri skul, 48 tisa na 1,160 sumatin long en.

Namba wan grup bilong ol elementeri sumatin husat i pinisim tripela yia long Siwai distrik i bin greduet long las yia. Dispela em ol sumatin bilong Hire elementeri skul. Nau ol i skruim skul bilong ol i go long Gret 3 long Monoitu Praimeri skul.

Em i tok ol manki i save amamas tru long skul long ol elementeri skul tasol sot long ol metiriel i mekim ol samting i hat moa.

Em i tok AusAID i bin helpim ol wantaim ol sampela metiriel tasol dispela i no inap.

Em bin tok ol no kisim gutpela sapot tumas tu long Buka edukesen opis wantaim ol metiriel samting.

WANTOK NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA VIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00



Pis em bun ya!

• Pis maket long Monoitis, Siwai i kamap strong long ol Sarere. Ol manmeri i no isi long baim pis na ol arapela gaden samting. Foto: VERONICA HATUTASI.

BIAZ BIABIA KRUIZ RALIN LONG NAIT...

MI GO SPIN LONG MUNLAIT PAS-TAIM!

BAGA TINGTING LONG PRETIM MAN YAH LONG MOTORAİK NA EM SAITIM KAR IGO LONG EM...

OL MOTORAİK MAN SAVE SO-OFF TUMAS... NAU YU PAIA STRET!!

EM LUKIM WANPELA LAIT LONG BIKPELA TIPA TRAK NA EM TING WANPELA MOTORAİK SIKST IKAM...

DISPELA MOTORAİK BAIK I MEKIM WANEM LONG NAIT!

TASOL NOGAT... TIPA TRAK I WETIM EM...

OK?!? MI TING MOTO BAIK...

Agrikalsa bai sapotim gut wok bilong stretim Bogenvil

AGRIKALSA em i bikipela hap long rot bilong kamapim gutpela sindaun long Bogenvil, Bogenvil Afeas Minista Sir Michael Somare i bin tokim bung bilong Nesanel Agrikalsa Konprens long Lae las wik.

Em bin tok maski ol bikipela agrimen olsem Lincoln na Sispaia Agrimen i no luksave long agrikalsa olsem wanpela rot we i ken sapotim na strongim wok bilong painim gutpela sindaun, yumi ken lukim long ples klia olsem agrikalsa em i hap long restoresen na developmen long Bogenvil.

"I klia olsem agrikalsa em i bikipela hap long wok bilong stretim ples na kamapim developmen. Na mekim isi long ol pipel long go bek long ples, sapotim ol yet na kamapim gut laip na sindaun bilong ol.


"Agrikalsa i ken sapotim tu wok long kamapim gutpela sindaun long ol arapela rot.

Sampela we i kliapela em long kamapim kaikai bilong wokim ol pasin kastam bilong bel isi. Na givim wok long ol grup we i bin stap insait long pait long Bogenvil olsem ol BRA, resistens, ol yut na ol komyuniti we i ken strongim wok bilong gutpela sindaun," Sir Michael i bin tok.


Em bin tok wok bilong skruim agrikalsa inap sapotim tu wok long lusim ol samting bilong pait, strongim sosel, lo na oda na ol arapela wok bilong kamapim gutpela sindaun. Tasol em bin tok long wok agrikalsa long Bogenvil i go gut, sapot i mas kam long komyuniti na praivet sekta.

Long dispela taim, Kakau na Kokonas Ekstensen Ejensi wantaim Yunaitet Nesens Developmen Program i wok long wanpela program bilong helpim ol Bogenvil fama long planim moa long nain milien diwai kakau na 100,000 diwai kokonas. Ol bin statim program long las yia na bai kos K6.2 milien. Antap long planim ol nupela diwai kakau na kkonas, ol arapela wok we dispela projek i karamapim em long helpim ol fama wantaim ol kakau fementri na kopra draia.

Sir Michael i bin tok bipo long hevi na Pang'na kopa main, Bogenvil i bin wanpela strongpela agrikalsa provins we ol pipel i bin save strong na hatwok long groim kaikai bilong ol yet na tu kaampim ol keskrop olsem kakau na kopra. Tasol hevi i bin bagarapim olgeta samting na nau ailan na ol pipel i mas stat gen long planim ol nupela gaden kaikai na ol keskrop.



SEPIK NIUS



Sir Pita laikim sapot bilong planim rais long Maprik

YAKAM KELO i raitim

LAPUN bilong palamen na memba bilong Maprik Sir Pita Lus i laikim Gavman i sapotim ol pipel bilong em long ilektoret na Is Sepik long groim rais bikos ol i statim dispela projek bilong planim rais pinis.

Sir Pita i tok distrik bilong em long Maprik i planim rais pinis na ol i save kisim na kaikai na tok rais i swit moa winim rais ol i save baim long stua. Ol rais long stua i save kam long Australia.

Sir Pita i tok Gavman i save tromoi klostu olsem K200 milien olgeta yia long baim rais i kam long Australia na dispela em

planti mani tru long kantri i lusim olgeta taim. Olsem na PNG yet i mas planim rais na larim dispela mani i stap bek long mekim kamap ol gutpela wok insait long kantri.


Sir Pita i tok PNG i kamap 25 krismas nau long independens na ol save bilong planim rais em PNG i mas save nau. Bikos olgeta taim i save gat ol saveman i kam long ovasis olsem Esia kantri long mekim stadi na givim trening long PNG. Tasol olgeta taim wankain toktok i wok long kamap yet olsem ol i wok long mekim stadi yet long rot na we bilong planim rais.

Sir Pita i tok PNG i noken wes-

tim moa taim long stadi tumas long planim rais bikos dispela save em ol manmeri i kisim pinis na nau em wok bilong Gavman long stat sapotim ol manmeri long mekim dispela wok long graun bilong ol wanwan.

Em i tok Agrikalsa dipatmen i mas go aut nau long ol ples na stat long wok klostu wantaim ol manmeri long strongim ol na givim ol sapot long planim rais.

Sir Pita i tok insait long Is Sepik ol distrik olsem Maprik na arapela distrik tu wantaim Nuku long Wes Sepik provins i save planim rais na ol pipel i save kaikai na tok em i swit winim rais bilong stua.



Longpela lain tru ya...

• Ol manmeri i pulim longpela lain stret outsait long PNGBC Beng long Wewak. Sapos yu laik go long Beng, yu mas go long moning yet na bai yu gat sans. Long ol arapela senta insait long kantri tu i gat dispela hevi bilong pulim lain na westim taim sanap i go inap long taim lain i sot. Sampela taim bai yu inap westim olgeta dei sanap long lain i go apinnun.



Lukluk raun...

• OL dispela manmeri i wok manmeri bilong palamen bilong Australia. Ol binmekim wanpela wokabaut i kam long lukluk raun long PNG na dispela em ol i sanap lukluk long Wewak, Is Sepik Provins taim ol i go long hap.

MV Rita na MV Momase bai ron long Sandaun

PAUL NENGAI i raitim

Lutheran Shipping kampani i surukim pasindia sevis bilong em i go long Vanimo Sandaun provins, Dek Supritenden Keke Geob i tokaut.

Tupela pasindia sip, MV Rita na MV Momase bai mekim wanpela ron long Vanimo long olgeta wik.

Em i tok ol i bin mekim tes pastaim wantaim ol kago sip i go long Vanimo na Aitape tasol i save kisim sampela de long sip i go kamap long hap. Tasol tupela nupela sip ya bai kisim wanpela de tasol long go kamap long hap bikos tupela i nupela na i gat spit.

Long pastaim MV Wewak na Malolo i save ron i go long hap tasol ol i save karim kago tu.

MV Rita na MV Momase i save ron olsem long Wewak na tu long Popondeta.

Em i tok i gat bikipela singaut nau long pasindia sip i mas go long Vanimo bikos long rot we i joinim Jayapura na ol nupela bisnis we i laik kamap long Fri Tred Jon long Sandaun provins.

Mista Geob i tok dispela ron bilong sip bai kamap bikipela long bihain taim na bai kamapim bikipela wok bisnis long sait bilong turis na pasindia.

Mista Geob i tok planti pasindia i save laik ron long sip bikos em i isi long baim.

I bin gat bikipela singaut i kam long sait bilong Vanimo long pasindia sip i mas givim sevis long dispela hap provins.

Mi ting balus fea i bikipela

tumas nau na ol manmeri i laikim sip i mas givim sevis long ol olsem na Lutheran Shipping i mekim dispela sevis long gutpela rot bilong helpim ol manmeri long dispela taim we planti samting long kantri i kos bikipela mani moa.

Em i laik i givim gutpela sevis long gutpela prais we ol grasrut pipel i ken baim, Mista Geob i tok.

Fea bilong pasindia sip i go long Vanimo em, long dek; ol bikipela manmeri K96.50, ol liklik pikinini K48.25, turis klas; ol bikipela manmeri em K120.50 na ol pikinini em K60.25.

Sip bai lusim Madang long olgeta Sande 2 kilok apinun na kamap long Vanimo long Mande apinun.

Sir Michael Somare i askim ol beng long stretim gut pasin bilong ol long givim dinau mani long ol liklik pipel bilong Papua Niugini bai ol i ken kisim gut dinau long mekim ol wok bilong ol.

Sir Michael i mekim dispela toktok long sapotim toktok bilong memba bilong Nawae Kennedy Wenge husat i tokaut long palamen olsem ol liklik pipel i save painim hat tru long kisim dinau long beng bikos beng i save askim ol kainkain askim na askim tu sapos ol manmeri bilong ples i gat wanem kain sekyuriti.

Sir Michael i tok dispela i no gutpela tru long ol beng i askim kain kain hatpela sekyuriti long ol manmeri bilong ples bikos ol manmeri i gat graun na ol samting bilong mekim mani i stap. Na olgeta taim bai ol istap yet long ples na mekim wok bilong traime kamapim mani.

Sir Michael i tok i mas gat gutpela lo o polisi bilong beng we i sut stret long interes na level bilong ol manmeri bilong ples stret bai ol tu i ken gat sans long kisim dinau mani long beng na mekim ol liklik wok na projek

bilong ol.

Em i givim piksa long em yet olsem beng bai givim em dinau mani isi bikos em i gat tupela haus wanpela long Wewak na wanpela long Mosbi. Na beng bai givim dinau bikos long dispela tupela sekyuriti bilong em. Tasol long skelim wantaim turangu ol liklik manmeri bilong ples, dispela i save hat tumas long ol.

Sir Michael i tok ol manmeri bilong ples i save gat ol gutpela tingting bilong kamapim sampela gutpela wok antap long graun bilong ol na ol laikim i mas gat sampela mani bilong strongim dispela tingting na wok bilong ol. Tasol beng i save mekim hat tru long ol long kisim dinau mani na i save kilim dai ol gutpela tingting na wok ol i laik kamapim.

Em i tok strong long ol bod memba bilong ol beng long toktok gut na stretim dispela wari na hevi bilong ol liklik manmeri bilong ples bai ol i ken panim isi sans long kisim dinau mani long beng olsem ol bisnisman na ol bikman husat i gat planti samting olsem sekyuriti bilong ol.



WIN! WIN! WIN!

TOYOTA HILUX 4WD TO BE WON!

AND 25 PEOPLE TO WIN K1,000 EACH

DRAWN ON 15th SEPTEMBER 2000



SEND IN ANY 3 EMPTY WRAPPERS OF HI-WAY HARDMAN OR HI-WAY BEEF IN AN ENVELOPE WITH YOUR NAME AND ADDRESS TO: EMTV P.O. BOX 443 BOROKO, NCD.






SAUTEN



RIJON



Katolik Yut So strongim kalsa na gutpela pasin

• LONG namba seven so, Katolik Kaisere Yut festival 2000 long las wiken i bin pulim planti manmeri na pikinini long en long Sir John Guise Stadium long Mosbi.

So komiti i bin statim wok long 1987. Bikpela tingting bilong so em long soim, strongim na skruim pasin kalsa bilong ol wanwan grup insait long kantri na ol pikinini i kam bihain i ken bihainim. Na tu long ol yangpela i bung long lotu, sea, pilai, wokim prensip na amamas wantaim.

Katolik Sios Yut Komiti i go aps long dispela so tasol em i save putim askim i go long ol yangpela bilong ol arapela sios long go insait long en.

Ol Katolik yut long Nesenel Kapitel, Sentrel provins, Kerema, Bereina na Oro i save bung long olgeta yia bilong kamapim so.

So i bin stat long Fraide na i go long Sarere na pinis long Sande.

Long Sarere nait i bin gat bikpela bung long Sivarai Namona klostu long Bomana we ol yut grup i bin gat Baibel kwis, string ben singsing, pilai drama na ol arapela pilai we ol wan wan grup yet i redim na kamapim long en.

Ekting siti edministreta Bernard Kipit taim em i tok amamas long ol yut grup na Katolik Sios bilong putim kamap so ya i bin tok PNG i kisim blesing long gat ol kain kalsa na holim pas yet long ol, maski ol samting bilong ausait na ol waitman i wok long kamap strong long pulim ol pipel long en.

Na em i amamas long sios na ol grup long kamapim kain so olsem we i ken strongim na givim yumi strongpela tingting long lukautim ol pasin tumbuna na kalsa bilong yumi. Em bin tok dispela progrem we ol yangpela i stap insait long en i gutpela bikos em i kamapim na strongim gutpela pasin na tingting long lukautim kalsa we NCDC i strongim. *Poto: IVAN BAYAGAU.*

Gordon Klinik i pas

GORDON Eben Klinik insait long Nesenel Kapitel Distrik bai i stap pas long wanem haus i no gutpela na i laik bagarap.

Klinik i stap klostu long Gordon maket. Ol helt atoriti long Nesenel Kapitel Distrik i bin lukluk long klinik bilding na tok em i no seif na ol i tokim ol wok manmeri long noken wok moa na ol no inap long kisim ol sikman.

Helt edvaisa long NCD Helt Sam Kove i tok ol i save long hevi i stap long Gordon Klinik tasol em i gat bikpela wok long stretim Sen Theresa's Klinik long Hohola insait long neks tripela yia. Na Gordon Klinik i mas wet i stap pastaim.

Em i tok bilding i laik bagarap na klostu i pondaun na ol atoriti i tok long lusim inap ol i wokim nupela long kisim ples bilong em.

Ol bin pasim Gordon Klinik las yia na ol ne na, ol sista i wok nau long Siks Mail klinik.

Ol i tokim ol sik manmeri na pikinini husat i stap long Gordons, Erima na Faiv Mail long go long Siks Mail Klinik taim Gordon Klinik i pas.

Tasol Mista Kove i tok planti bilong ol i wok long go long Pot Mosbi Jenerel Haus sik we ol i no sapos long go long en.

Mista Kove i tok klina tasol i stap na lukautim haus inap ol i rausim.

Em i tok haus sik bilding ya em ol bin wokim i no long taim i go pinis wantaim mani ol i kisim long Esia Developmen Beng. Em i no winim yet nainpela krismas tasol em i bagarap pinis.

Em i tok narapela faivpela klinik bilding we ol bin wokim long semtaim wantaim Godens Klinik i stap gut yet.

Ledi Kidu laikim NCDC politikel lidasip i pas yet

YAKAM KELO i raitim

MEMBA bilong Mosbi Saut Ledi Carol Kidu i tok Praim Minista Sir Mekere Morauta i tok stret olsem politikel sistem bilong Nesenel Kapitel Distrik Komisn (NCDC) i mas kamap gut pastaim long ol i rausim saspensen. Na dispela em bikpela wok NEC wantaim Minista bilong Provinsal Afeas long mekim hariap pastaim long ol i ken rausim saspensen long NCDC.

Nau yet NCDC i stap aninit long ol miks lo bilong 1995 Ogenik Lo na 1990 NCD Lo. Em i wanpela sistem we opis bilong Gavana i gat bikpela pawa tru na i no save yusim stret. Em i wanpela sistem we ol Lokol Level Gavman na Motu Koitabu Kaunsil i no save kisim gutpela baset na baset i no save go long ol bihainim taim na i nogat trupela pawa long ol Lokol Level Gavman i mekim wok bilong ol, Ledi Kidu i tok.

Ledi Kidu i tok sistem bilong NCDC i olsem sapos wanpela man i no sapatim politiks bilong ol bai ol i rausim em na mekim ilektoret bilong em i kisim bikpela hat taim long mani na ol sevis o developmen samting. Em i wanpela sistem we ron bilong mani i no go stret na sampela Komisina na ol politiks lain i save

kisim strong long baset bilong NCDC long helpim ol sapota na pren bilong ol na ol yet tu wantaim.

Ledi Kidu i tok ol dispela toktok bilong em i gat rekot long sapatim we ol Komisina na politiks lain i save yusim mani long baset vot na ol komplem i bin kamap long em long 1999 long dispela.

Ledi Kidu i mekim dispela toktok long rausim ol komplem olsem Praim Minista Sir Mekere Morauta i bin mekim nek nogut long ol mama long ilektoret bilong em. Ledi Kidu i tok Sir Mekere i tok no tok long olgeta meri. Sir Mekere i bin tok olsem sampela lain i save kisim strong long NCDC na dispela toktok i bagarapim bel bilong ol meri bikos ol i tok ol i save wok hat na stap long strong bilong ol yet wantaim famili bilong ol.

Ledi Kidu i tok pastaim NCDC i save kisim ol yut na ol meri long mekim ol liklik wok olsem ol kesuel woka o hap taim woka. Na dispela i no save helpim ol bikos i mas gat gutpela progrem tru bilong givim trening na helpim ol yut na ol meri long kisim gutpela save na helpim i ken kamap bihainim. Em i tok dispela kain sistem i mekim planti lain i save gat sans long mekim ol hait wok na kain kain wok nabaut na kisim pe na paulim bikpela mani bilong NCDC.



Roots Rice 1 kg	K1.37
Cold Power 200gr	K1.33
Paradise No.1 Biscuits 100gr	K0.44
Zenag Kaikai 900gr	K4.60
Ilimo Eggs 60gr Doz	K3.50
Saveloys per kg	K3.95



Maggi Noodles 85 gr	K .50
Blue Bird Sardines 423gr	K1.95
Sunshine Milk 1litre	K0.95

EXTENDED TRADING HOURS	
Monday to Wednesday	- 8.00am to 7.30pm
Thursday / Friday	- 8.00am to 8.00pm
Saturday / Sunday	- 8.00am to 7.00pm

Planti moa kaikai prais i go daun long en!

Ph: 325 7566, 325 0863 Fax: 325 7096



HAILANS NIUS



Ol Hailans kopi growa egensim gavman long kirapim NAC Bod

JOHN SUPA i raitim

OL KOPI growa insait long Hailans i no aikim gavman long kirapim Nesenel Agrikalsa Komoditi Bod na ol i singaut long en long lus tingting long disisen em i mekim long dispela samting.

Aninit long dispela bod we gavman i laik kirapim bai lukautim ol komoditi krop olsem kakau, kopra na kopi aninit long wanpela ambrela.

Ol kopi growa i egensim tru dispela disisen bilong gavman na long las wik, planti tausien pipel i bin wokim wanpela reli long Indipenden Pak long Goroka bilong soim no laik bilong ol long dispela samting. Antap long en, 12-pela bikman i makim ol smolholda kopi growa long Isten Hailans i bin sainim wanpela petisen we ol i singautim nesenel gavman long rausim disisen bilong em.

Ol konsalten bilong Yunaitet Nesens Fud na Agrikalsa Ogenaisen (FAO) i bin kamap wantaim tingting bilong nupela straksa na ol i putim i go long nesenel gavman long ol agrikalsa krop we kantri i save kisim mani long ol bilong kam aninit long wanpela grup tasol. Dispela em long NAC Bod.

Petisen i askim strong gavman long rausim dispela disisen na noken bihainim.

Ol bin givim petisen ya i go long han bilong memba bilong Goroka Henry Smith na em i givim pinis long Praim Minista Sir Mekere bilong lukim, glasim na skelim na gvim tingting bilong em long dispela samting.

Long reli o bung bilong ol Isten Hailans

kopi growa, ol bin tok sapos nesenel gavman i go het na kirapim NAC Bod, ol bai kamapim trabel.

Wanpela mausman bilong Yonki eria grup i tok ol bai bagarapim pawa saplai stesen long autim belhat bilong ol. Ol arapela i tok ol bai bomim ol bris long okuk Haiwe, kukim ol gavman ka, wankain tasol olsem ol bin mekim long len rifom isu long 1990.

Petisen i bin tok as tingting long gavman i laik kamapim dispela NAC Bod i korap na bai i no inap long kamapim wanpela gutpela samting long ol kopi growa, planti husat i stap long ol rurel eria.

Em i tok Kopi Industri Koporesen (CAC) em i mekim gutpela wok na olsem kopi bisnis i ron gut na ol growa i amamas bikos ol i lukautim ol gut.

Em bin tok CAC i ron gut bikos gavman i no putim han bilong en long em olsem em i mekim long ol arapela bod na ol i bungim hevi long sait bilong mani.

Petisen i tok ol i ken lukim long ples kjiia olsem dispela senis we gavman i laik kamapim em wok bilong ol ol politisen na ol poroman bilong ol long hajekim bisnis we i save lukautim planti pipel tru na olsem ol i putim strongpela singaut i go long Praim Minista bilong noken larim ol politisen na ol poroman bilong ol i go insait long kopi bisnis we i save pulim K500 milien i kam insait long kantri long wa wan yia.

Ol i tok ol i pret long wok politiks i go insait bikos long ol hevi na bagarap we i kamap long mani bilong ol pipel long NPF, Air Niugini, Telikom na POSF na ol no laikim wankain samting i kamap long CAC.



Mani stap long graun...

• Dispela ol bikman bilong Hagen i amamas long mekim wok long graun bilong ol. Sapos yu planim wanpela samting, dispela bai bringim kaikai na tu mani i kam insait long wanwan eria bilong yumi. Sapos yu sindaun nating bai yu no inap kisim wanpela samting nating. Foto: TIMOTHY AIMS

Minista Baing tokim pipel long strongim kalsa

PNG i mas lukautim ol kalsa na pasin tumbuna long ol pikinini na bubu bilong yumi i kam long bihain taim bilong lukim na bihainim. Kalsa na Turisim Minista Andrew Baing i bin tok taim em opim Hagen 2000 So long Kagamuga so graun insait long Westen Hailans long las wiken.

Mista Baing i tok PNG i gat planti kain kalsa long Pasifik rijen na yumi i mas lukautim, strongim na autim long pablik na ol turis i ken lukim.

Em bin tok ol yangpela bilong tude i mas lainim

kalsa. Em bin tok ol turis bilong ol narapela kantri i gat bikpela laik long lukim kalsa bilong PNG na ol i wok long kam long ol so olsem Hagen so na ol arapela.

Mista Baing i bin tok ol provins i mas strongim pasin tumbuna na long wokim dispela, i gutpela long ol i holim ol kalsarel so olsem wanpela rot long promotim ol.

Long wankain taimWesten Hailans Gavana Pater Robert Lak i bin tok gavman bilong em bai go het long strongim na sapotim Hagen So long ol

ya i kam.

Em bin autim dispela tok long moa long 10,000 pipel husat i bin stap long so long las wiken Sarere

Pater Lak i bin tok promotim kalsa na turisim i bikpela samting na sapos yumi nogat samting long wokim, dispela i wanpela samting we yumi i ken wokim long promotim kantri.

Em bin tok sapos yumi promotim kalsa na turisim insait long PNG, em bai i stap na ol lain i kam bihain long i ken save na bihainim na skrum ol pasin tumbuna.

NIU PELA

STRONGPELA TRU

Colgate

Toothpaste bilong PNG Stret!



Strongpela, waitpela helti tit na gutpela smel long liklik prais tasol - nau em bai givim yu Colgate Strongpela Tru Smael.



Momase Rijnel Sekreteriet laikim K93,808 moa

ENNIO KUBLE i raitim

MOMASE Rijnel Sekreteriet opis we ol i bin opim long wanpela fotnait i go pinis i laikim K93,808 moa long pinisim olgeta wok bilong ol.

Madang provinsel edministreta na siaman bilong Momase edministresen, Clant Alok, i tok ol foapela provins, Morobe, Madang, Is Sepik na Sandaun provins i bin putim

K300,000 long kirapim dispela opis. Tasol em i tok, ol i laikim moa mani long ol dispela provins.

Wan wan bilong ol dispela provins i bin putim K75,000 pinis na ol i mas putim K37,533.20 moa.

Mista Alok i askim tu foapela provinsel gavman long baim wanpela ka bilong dispela Sekreteriet. Opis bilong Sekreteriet i stap insait long Madang Provinsel hetkwata long Yomba.

Madang laik bringim helt sevis i go klostu long ol pipel

PIUS IKUMA i raitim

MADANG Provinsel Gavman i go het wantaim plen bilong en long bringim gutpela helt sevis i go long ol pipel insait long ples, Provinsel Deputi Edministreta, Augustine Dunstan i tok.

Mista Dunstan i tok provinsel gavman nau i gat tripela haus sik bilong ol ples: Yagaum klostu long Madang, Gaubin long Karkar

Ailan na Bogia.

Em i tok i gat plen long hapim Saidor helt senta insait long Raikos distrik i go kamap wanpela haus sik bilong ol ples.

Mista Dunstan i tok Nesenel Helt Dipatmen i mas givim mani long mekim nesenel helt plen i karim kaikai. Ol haus sik bilong ol ples i stap insait long plen.

Em i tok ol helt sevis long Madang na long ol arapela hap bilong kantri i go daun long han bilong ol provins na

ol distrik edministresen aninit long lo bilong nupela rifom sistem.

Mista Dunstan i tok ol plen bilong pasim Paramed o Koles bilong Allied Helt Saiens i no kamap. Ol mas putim moa samt- ing i go insait bai dispelaskul i ken go het long karim aut wok bilong en long skulim ol helt ekstensen opisa.

Em i tenkimtu ol lotu long helpim long kamapim helt sevises bilong ol pipel long provins.

Madang paia stesen bai kisim nupela paia ensin

KINGSTON NAMUN i raitim

WANPELA paia stesen long Madang i stap long Modilon bai kisim wanpela nupela ensin long narapela yia.

Paia Stesen Komanda Samson Polly i tok em i hop stesen bai kisim dispela nupela paia ensin long Jun long narapela yia.

"Wantaim sapot bilong provinsel gavman na helpim bilong AusAID, mipela i bilip, mipela bai kisim dispela paia ensin," em i tok.

Dispela nupela paia ensin em hap bilong AusAID plen long givim faipela stesen long PNG14 nupela paia ensin. Kos bilong ol dispela paia ensin em i moa long K500,000 na ol bai putim ol nupela mesin i go insait long dispela ol paia ensin bilong stapim paia.

Nau yet stesen i gat wanpela paia ensin, we Niu Silan gavman i bin givim 12 yia i go pinis. Dispela ensin i no inap givim sevis long olgeta hap bilong Madang taun na ol ples klostu.

Mista Polly i tok ol i bin laki long wanem taim ol pipel askim long sevis bilong ol, i no bin gat ol bikpela paia. Em i tok tu olsem i gat plen long kamapim ol duti bareks long Mero, long Not Kos bilong Madang.

"Bai i gat 12 haus, tripela be stesen bilong paia ensin, 10-pela marit kwata, na wanpela singel kwata bilong ol man," em i tok.

Em i tok plen bilong wanpela bareks i stap insait tu long proposal bilong nupela paia ensin, we ol i givim i go long AusAID long dispela yia.

Mista Polly i tok tu olsem em i namba wan taim insait long planti yia long lukim Madang provinsel gavman i helpim Madang paia stesen.

Em i tok nau stesen i luk nais bikos ol i kisim K70,000 long mentenens na penim ol haus. Em i tok ol wokman bilong em i kisim tu 40 nupela yunifom long kos bilong K5,960 na dispela ol yunifom inap stap inap tripela yia olgeta.

Madang pablik matmat i pas

MIRIAM MANTU i raitim

MEYA bilong Madang Taun, Steven Amenasik, i givim oda long pasim Madang Taun Kaunsel long pasim Madang taun pablik matmat.

Madang Taun Interim Komisen i paitim toktok wantaim Lands Dipatmen long wanpela graun long kamapim narapela pablik tolet.

Kas laikim gavman skelim gut pawa long olgeta provins

PATRICK MATBOB i raitim

MADANG Gavana Jim Kas i tok sapos PNG gavman i givim planti pawa long Bogenvil long lukautim ol yet (moa atonomi), orait em i mas redi long givim wankain ofa i go long ol arapela provins.

Mista Kas i tok i luk olsem nesenel gavman i no inap stretim wari bilong wan wan provins tasol tingting bilong kamapim stet gavman em i orait. Em i tok tingting bilong kamapim ol stet gavman i bin kamap long 1970's taim

Memba bilong Rabaul, Sir John Kaputin i bin tokaut.

Tasol gavman i no bin bihainim dispela tingting bikos long ol eksperiens ol arapela kantri i develop pinis i bin bungim. Olsem na nesenel gavman i tok orait long yusim provinsel gavman sistem.

Mista Kas i tok em i bin go pas long kamapim Momase Rijnel Kaunsel we ol arapela Momase gavana i sapotim.

Em i tok dispela i mas opim rot bilong kamapim stet gavman long bihain taim.



Sainim Memorandum Ov Agrimen!

• Ol Mindere papagraun i no save wanem taim Praim Minista Sir Mekere Morauta bai i go long Madang long sainim Memorandum Ov Agrimen wantaim olgeta ol papagraun bilong Ramu Nikel na Kobalt projek. Long dispela poto ol i sanap long liklik bris long Basamuk basis na lukluk i go long Madang taun na putim ia long wanem samtng bai kamap. Poto: Wenceslaus Magun.

Wenge laikim ol Momase lida mas wok bung

ANNA AWASA na PATRICK MATBOB i raitim

MORobe Gavana Luther Wenge i salensim ol Momase lida long wok bung wantaim long salim ol Momase pipel i stap long ol setelmen long ol arapela provins long go long ples bilong ol.

Mista Wenge, husat i holim wok tu olsem siaman bilong Momase Rijnel Seketeriet, i tokim ol lida husat i bin kamap long Momase Rijnel Konferens long Madang olsem planti pipel i stap long ol 'kompaun' long ol

arapela provins.

Mista Wenge i kros tu long ol edministreta bilong ol provins na ol wok manmeri bilong gavman long i no kamapim ol gutpela wok developmen na karim aut ol polisi long ol provins.

"Planti ol pablik sevans i wok long dring na draiv raun long ol naispela ka, taim ol i mas go long ol pipel long ol ples na bringim infrastraksa developmen i go long ol," Mista Wenge i tok.

"Yumi mas mekim planti samt- ing long kamapim ol liklik bisnis bilong ol pipel bilong yumi we ol i ken lukautim na ronim longpela taim," Mista Wenge i tok.

Em i tok bel hevi long i no lukim ol developmen i kamap i lukim ol pipel i lusim ol rjen bilong ol na i go wok long ol plentesin long ol arapela provins.

Em i tok ol i no mas mekim olsem bikos Momase i gat anti neserel risos we i ken rkim dispela rjen i go pas long l'znis bilong agrikalisa na ol arapela bisnis long kantri.

Em i tok insait long ke ipen bilong em agensim Velu Eded Takis (VAT) long kantri, sa ipela bilong ol dispela pipel i bin tokaut long tingting bilong ol lo g go bek long provins bilong ol.

Ol Lutheran bilip manmeri long Madang stretim haus lotu

ANNETTE SETE i raitim

OL Lutheran bilipmanmeri long Tarangau Rot long Niu Taun i stretim wanpela olupela haus lotu bilong ol we ol misinari i bin wokim long 1968.

Siaman bilong kongrigesen Sama Mellombo i tok ol pipel i kamapim tingting stretim dispela haus lotu bikos em i wok long bruk i go daun.

Em i tok: "Dispela haus em i olupela tru, olsem na mipela laik mekim em i luk orait liklik."

Em tok, pastaim ol i wokim dispela haus lotu olsem wanpela klasrum na wol bilong en i go antap long bel bilong man o meri tasol.

Insait long plen bilong stretim dispela haus lotu, ol i tingting long mekim wol i go antap olgeta long het bilong haus.

Mani bilong stretim dispela haus lotu i no kam long Lutheran misin o long gavman, Mista Mellombo i tok. Em i tok kongrigesen yet i bungim mani long stretim dispela haus lotu.

Mista Mellombo i tok ol i salim ol kol dring, senisim basket na askim Quast tiata grup bilong Finschafen long go putim wanpela pilai na mani ol i kisim long dua i go long stretim dispela haus lotu.

Em i tok: Liklik hap wok long pes bilong haus lotu ya i kostim mipela klostu K1000 na long pinisim wok, em

bai olsem K5000."

Mista Mellombo i tok ol komyuniti i bungim het long painim mani bilong stretim dispela haus lotu.

Pastaim ol i bin wokim dispela haus olsem wanpela komyuniti haus, tasol bihain ol i bin yusim olsem haus lotu long planti yia i kam inap nau em i namba wan taim ol i stretim.

Wanpela Lutheran man husat i bin stap long taim ol i bin wokim dispela haus i tok, em i bin kisim ol samting olsem 5-pela yia long mekim dispela haus long wanem, ol i no bin kisim mani long mama sios. Nogat. Em i tok, ol bilip manmeri yet wantaim ol misinari i bungim mani na wokim dispela haus lotu.

Bilong wanem PNG i gat pasin pamuk?

WENCESLAUS MAGUN i raitim

"Bilong wanem Papua Niugini i gat pasin pamuk? Bilong wanem ol meri i go salim ol yet bilong kisim mani? Ol i save pilim olsem wanem taim ol i salim bodi bilong ol long kain man?" Dispela em sampela ol bikipela askim Dairekta bilong Melanesian

Enva iromen Foundesen, Reveren George Euling i bin salim Wantok long dispela wik.

Em i tok PNG sosaiti i no tok orait long pasin pamuk tasol pasin pamuk i stap insait long sosaiti tude.

Em i tok ol lain i go pas long lo tu i larim pasin pamuk long stap insait long sosaiti.

Em i tok dispela

ol samting i wok long kamap nau yet.

Reveren George i tok ol meri husat i wokim pasin pamuk i gat as bilong mekim kain pasin olsem.

Tasol em i tok dispela pasin em i no gutpela na gavman na sios i mas karim aut planti awenes long skulim ol pipel long lukautim na rispek-tim laip bilong ol.

Ol yut i go long Rome

NOELLA WAVU i raitim

FOAPELA sumatin bilong Divain Wod Yunivesiti (DWU) i makim foapela rijen bilong Papua Niugini na i go long namba 7 Yut Forum long Rome long Ogas 12 i go long 15.

Maus man bilong Niugini Ailan em Joseph Dunlee bilong Rabaul, Benjamin Bosila bilong Wewak i makim Mamose Rijen, Lawrence Kirilyo bilong Wabag i makim Hailens Rijen na Ambrosia Kavale bilong Mosbi i makim Sauten Rijen.

Nesanel Sekreteri bilong Leiti na Het bilong Katolik Yut long Bisop Konferens, Lasarus Sopale, i bin go wantaim ol dispela yut.

Richard Kelebi, nius man bilong Siti Hall Nius na Infomesen Sevises Program tu i bin go wantaim ol dispela yut.

Ol dispela yut bai kam bek

long dispela wik.

Pontifikel Kaunsel bilong ol Leiti i bin kamapim dispela namba 7 Intanesenel Yut Forum we i kamap long Casa Maria Mater Ecclesiae long Rome. Dispela selebresen i kamap long Tor Vergata Yunivesiti insait long Rome yet.

Ol i bin kamapim dispela Forum long makim Wol Yut De long Ogas 19 na 20. Astingting bilong dispela Forum em, "Mi tok olsem long olgeta manmeri: Yumi mas go aut na bihainim lekma bilong Krais."

Ol yut bilong olgeta hap bilong graun bai bung wantaim long beten. Man husat bai go pas long dispela Misa em Papa Santu Pop Jon Pol II yet.

Wan wan Bisop Konferens i bin kisim askim long salim tupela mausman o meri bilong makim ol Katolik Yut grup na asosiesen bilong ol.

Lutheran Sios tenkim pipel bilong Rabaul long yusim nem Minigulai

FRANCO NEBAS i raitim

MOA long 500 pipel bilong kain kain lotu insait long Rabaul taun i bin bung wantaim long wanpela spesel lotu long Rabaul Lutheran Sios las Sande.

Astingting bilong holim dispela spesel lotu we ol memba bilong Evangelikol Lutheran Sios bilong Papua Niugini i stap long Rabaul i bin oge-naisim, em long tenkim ol pipel bilong Is Niu Briten na ol lida bilong ol long yusim tokples Kuanua na givim nem bilong wanpela sip bilong Lutheran siping olsem *MV Minigulai*.

MV Minigulai long tokples Kuanua i min olsem taragau bilong solwara. *MV Minigulai* i save ron namel long Kimbe na Rabaul.

Bihain long lotu, ol kain kain sios i putim kamap ol kain kain drama, kwaia, singsing na ol arapela samting tu i kamap i olsem sampela ol lida bilong komyuniti, sios na gavman i go raun liklik antap long *MV Minigulai* long Rabaul basis.

Ol gavman lida husat i bin kamap long dispela selebresen em long Minista bilong Transpot na Sivil Aviesen, Bart Philemon, Morobe Gavana Luther Wenge, Is Niu

Briten Gavana, Francis Koimanrea, Sir Alkan Tulolo, wantaim ol Sios lida olsem Lutheran Siping Jenerel Menesa, Terry Fevery na ol bod memba bilong Kambang Holdings.

Het Bisop bilong ELCPNG, Dokta Wesley Kigasung i tenkim ol pipel bilong Is Niubriten na ol lida bilong ol long kolim nem bilong wanpela sip bilong Lutheran Sios long Kuanua tokples.


Em i tok em i no rong long kolim nem bilong wanpela Lutheran sip long tokples Kuanua olsem planti ol sios memba i wok long tok.

Em i tok i gat as bilong ol lida bilong Lutheran Sios i go long Rabaul long tenkim ol pipel bilong Rabaul.

Em i tok namba wan Lutheran misinari, Johannes Flierl i bin go long Rabaul 114 yia i go pinis na i sua long Raluwan ples we em i wokim namba wan sel bot na i go wantaim ol misinari bilong em long autim gutnius.

Em i tok long dispela as, long soim bikipela amamas bilong Lutheran Sios, sios i kolim nem bilong wanpela pasindia sip bilong en yusim tokples Kuanua.

Sir Alkan Tololo i makim maus bilong ol pipel bilong Rabaul na tenkim ELCPNG na Lutheran Siping long ol sevis ol i givim long helpim ol 'liklik' pipel.



Wanem lotu i gat rait!

• Dispela haus lotu bilong ol Muslim long Hohola, Mosbi i kamapim planti toktok long wanem lotu i gat rait o nogat rait long autim gutnius bilong ol long Papua Niugini.

Mama Lo bilong tambuim ol lotu i no inap amamasim God, Reveren Euling i tok

DAIREKTA bilong Melanesian Enva iromen Foundesen, Reveren George Euling i tok, tingting bilong Minista bilong Yut na Hom Afeas, Andrew Kumbakor long senisim Mama Lo bilong Fridom Ov Rilijen, olsem wanpela rot bilong tambuim ol lotu ausait long Kristen lotu long kantri, i no inap amamasim God.

Em i tok long senisim Mama Lo bilong Fridom Ov Rilijen, Gavman i laik fosim ol pipel long bihainim wanem lotu Gavman yet i gat laik long en na i no givim fridom long ol pipel yet long bihainim wanem lotu ol i laikim.

Reveren Euling i tok, olgeta pipel maski ol bilong wanem hap bilong graun, na ol i gat planti samting o nogat, ol i ris o pua, wait o blek, na i

gat wanem kain lotu, olgeta i gat wankain rait long mekim disisen bilong kisim wanem samting ol i laikim long laip bilong ol.

Em i tok long yusim ekus olsem, 'bikos ol Muslim i save kilim ol Kristen long arapela hap bilong graun yumi mas kamapim lo bilong tambuim ol long kam autim bilip bilong lotu bilong ol long PNG,' em i tingting bilong ol man save bilong ol i no op yet na tu i no bihainim bilip bilong Kristen lotu.

Reveren Euling i tok long bel bilong em yet, em i no laikim ol skul bilong Muslim lotu long wanem ol i save skulim ol lain bilong ol long kamapim birua pasin wantaim lotu bilong ol Kristen na Juda pipel

Tasol em i tok tingting bilong em i no wankain long tingting bilong God

Em i tok long ai bilong God, olgeta pipel maski ol i gat wanem kain bilip, kalsa, tokples, na pasin, olgeta i pikinini bilong God na Kristen lotu i bihainim dispela skul.

Reveren Euling i tok Kristen lotu em i lotu i save larim o i no save protes long ol arapela lotu. Em i tok long kain pasin bilong Kristen lotu, Kristen lotu i save go insait long ol kantri we bilip Kristen i no stap na bringim Gutnius bilong Krais i go long olgeta hap bilong graun.

"Papua Niugini i wok long salim ol misinari i go long ol kantri i gat Muslim long en. Sapos PNG inap mekim olsem na i no pret long ol misinari bilong en i go na dai, bilong wanem as yumi no inap larim ol Muslim i kam long PNG," Reveren Euling i tok.

Wai laikim Ripablik ov Melanesia long Pasifik

YAKAM KELO i raitim

MEMBA bilong Karimui Nomane Simeon Wai i askim Gavman long traim pasim toktok wantaim ol arapela Pasifik kantri na kamapim wanpela bikpela bodi na kolim olsem Ripablik ov Melasia.

Mista Wai i mekim dispela toktok long palamen long autim tingting bilong em bihainim ol bikpela senis we i wok long kamap long ol bikpela kantri olsem Yurop we ol i bung wantaim na kamapim wanpela mani tasol, em Yuro dola. Dispela i min olsem ol kantri insait long biknem Yurop kantri i gat wanpela mani tasol.

Mista Wai i tok taim mani bilong ol dispela kantri i wanpela tasol, ol i gat strong long sanap wantaim na mekim olgeta wok na developmen na helpim long ol yet.

Em i tok insait long Pasifik kantri mipela igat ol wansolwara pren i stap olsem Solomon Ailan, Fiji na Vanuatu na ol arapela liklik ailan kantri tu i stap. Olsem na mipela i mas bung wantaim nau long kamapim wanpela bikpela luksave na sanap wantaim insait long rijon bilong mipela.

Mipela Wai i tokaut olsem insait long Pasifik kantri mipela i bin bungim pinis planti hevi na trabel olsem hevi bilong Bogenvil, hevi nau long Fiji na Solomon Ailan na ol arapela hevi bilong ekonomi na politiks. Olsem na mipela i mas sanap wantaim nau long stretim ol kain hevi olsem na sanapim strong bilong ol Pasifik kantri insait long wol. Na mipela i mas sanap aninit long wanpela nem olsem Ripablik ov Melanesia bikos mipela em ol Melanesia pipel insait long dispela sait bilong solwara.

Gavman i no mekim wanpela samting yet, Wama i tok

Memba bilong Madang Open Jacob Wama i tokaut olsem dispela Gavman bilong Sir Mekere Morauta i no kamapim wanpela bikpela senis insait long kantri taim em i kisim Gavman 12-pela mun i go pinis.

Mista Wama i tok i nogat wanpela senis i kamap bikos olgeta gutpela gutpela askim na ol toktok we i stap long notis pepa bilong palamen we ol memba i givim long Praim Minista i nogat wanpela bekim i kam long ol yet.

Praim Minista i save tok em bai givim ansa o bekim ol dispela toktok tasol inap nau em i no bekim wanpela gutpela ansa yet long ol gutpela toktok na poin we i bikpela samting long helpim dispela kantri.

Mista Wama i tok em i lukim olsem wanpela gutpela senis tasol dispela Gavman i laik kamapim em long nupela lo bilong taitim wok bilong ol politikel pati ol i kolim Intagriti ov Politikel Pati bil. Palamen bai inap pasim dispela lo long dispela wik.

Dispela lo bai i mekim hat long planti politikel pati na wanwan memba long i no ken kalap nabaut tasol ol i mas pas long wanpela pati tasol. Dispela bai daunim tu planti pasin bilong grisim ol memba, baim ol memba long mani na promis long givim ol bikpela wok o ministri long Gavman.

PASIN kalsa na tumbuna em i bikpela samting na long olgeta hap bilong wol, ol kantri na pipel i laik holim pas long ol dispela samting. Moa yet long dispela taim bikos ol pipel i laik luksave ol i kam we na wanem ol pasin bilong ol tumbuna bilong ol na we ol i ken skruim i go nau na long bihain taim.

Japan em wanpela kantri we i wok long mekim olgeta samting long lukautim na skruim pepa bilong pasin kalsa bilong ol pipel bilong em. Long wokim dispela, em i gat ol skul na ol save manmeri husat i save tisa long ol samting bilong lainim pasin kalsa na tumbuna long en.

I no long taim i go pinis, Embasi bilong Japan wantaim Japan Faundesen i bin holim kait so long Mosbi.

Na long las wik, Embasi na Faundesen gen i bin kodinetim wanpela Ikebana so long Islander Hotel long Mosbi we wanpela savemeri na tisa bilong Ikebana long Sogetsu skul long Tokyo Japana, Koka Fukushima i bin soim ol meri na sampela man rot long putim gut ol flawa bilong bilasim haus, yusim long taim ol bikpela samting i kamap na ol arapela moa.

Long Japan, Ikebana i min olsem kain stail yet bilong putim gut ol flawa

bilong bilasim na mekim ples i luknais. Na long wokim Ikebana, ol i save yusim ol flawa ol i katim tasol, ol han bilong flawa na diwai, ol lip, gras, ol prut, ol plawa i op, ol drai plawa na diwai na ol arapela samting moa olsem plastik na glas. Taim ol i stap long narapela kantri, ol i save yusim ol plawa na ol prut samting bilong dispela kantri we ol i stap long en.

Long Ikebana skul, ol i save skulim ol long rait rot bilong katim plawa, wanem ol kala i go gut wantaim na kamapim gutpela bilas na moa.

Bihain long em i pinsim skul long yunivesiti, Mis Fukushima husat i bin gat bikpela laik long Ikebana i bin kirapim Ikebana skul we em i ronim long 14 krismas nau.

Em i tok ol i yusim Ikebana long bilasim windua, haus, stoa, long amamas taim na bilasim ples, ol bikpela samting we stet, gavman na praiwet lain i putim kamap.

Em i tok long taim ol i kirapim Ikebana long pasin kastam bilong Japan 500 krismas i go pinis, ol save bilipim olsem em i gutpela sainmak i go long bilip bilong lotu na bihain pasin bilong bilas i kam insait long en.

Ikebana i gat samting olsem 3,000 skul long

Ikebana strongim kalsa na bilas



• Ikebana Tisa bilong Sogetsu skul long Tokyo, Koka Fukushima i yusim han mango wantaim prut long wokim Ikebana bilas long Ailenda hotel long Mosbi. Foto: IVAN BAYAGAU. wol insait long 40 kantri. go pas long en.

Sogetsu Ikebana skul we Mis Fukushima i ranim em ol bin kirapim 70 krismas i go pinis. Na ol sumatin meri na man tu i gat krismas namel long 17 inap long 70 yias.

Em i tok ol manmeri wantaim i save gat bikpela laik long lainim rot bilong putim gut ol flawa na mekim ples i luknais.

Ikebana so long Islander em Eri Tanaka meri bilong Japan Embaseda long PNG na Ledi Roselyn Morauta meri bilong Praim Minista Sir Mekere Morauta i bin

Long dispela taim tu, i bin gat donesen bokis we ol lain i kam long so i putim liklik toea long helpim tupela grup olsem Friends Faundesen INC na Friends of the Disabled Foundation long Mosbi. Na ol bin kisim K2,090 we ol i givim long tupela grup ya.

Misis Tanaka husat i kisim planti askim pinis sapos em i ken lainim sampela manmeri long Mosbi long wokim Ikebana i bin tok em bai lukluk long dispela samting.



RENAULT
TRUCKS

STAP NAU LONG ELA MOTORS

Kerax

400HP HEVI DUTI

PRIME
MOVER

LONG KISIM MOA SAVE LONG DISPELA PLIS RINGIM ELA MOTORS
KLOSTU LONG HAP BILONG YU:

PORT MORESBY: CHRIS BATTEN PH 3229467 FAX 3217268
LAE: IVAN GAWI PH 4722173 FAX 4722463
MT HAGEN: EDMUND TOPERCZER PH 5421888 FAX 5421937

Ela Motors
TRUCKS

E-MAIL: elatrucks@elamotors.com.pg





• Minista bilong Yut na Hom Afeas Andrew Kumbakor i amamasim Nesenel Katolik Wimens De long Mosbi las wik. *Poto: IVAN BAYAGAU.*



• Oi yangpela bilong Katolik Yut long Mosbi i brukim kundu na kalap kalap long kalsa de bilong ol long las wik Sarere long Sir John Guise Stedium.



• Lephan: Oi mama na yangpela meri bilong Kompam Ambum i bilas na sanap redi long welkamim Prais Minista na ol arapela lida husat i go raun long Kompam Ambum na Porgera long las wiken.

• Antap: Prais Minista Sir Mekere Morauta na John Pundari i holim piksa long soim bung wantaim we tupela i mas strongim long gavman.

PAPUA NEW GUINEA'S SILVER JUBILEE

School Essay Competition



About the Competition

- Category 1:** ALL STUDENTS IN GRADE 3 & 4
Essay Topic: "Who was the Prime Minister 25 years ago?"
 Tell us more about him.
Essay Length: 200 Words
Prizes: 1st prize: K300.00 2nd prize: K100.00 3rd prize: K50.00

- Category 2:** Level 1 ALL STUDENTS IN GRADE 5 & 6
 Level 2 ALL STUDENTS IN GRADE 7 & 8
Essay Topic: "What is Independence and what it means to me?"
Length of Essay: 500 words minimum
Prizes: 1st prize: K500.00 2nd prize: K250.00 3rd prize: K125.00
 awards to each level

- Category 3:** Level 1 ALL STUDENTS IN GRADE 9 & 10
 Level 2 ALL STUDENTS IN GRADE 11 & 12
Essay Topic: "How would you see PNG's Growth in the next ten (10) years?"
Essay Length: 1000 words minimum
Prizes: 1st prize: K1000.00 2nd prize: K500.00 3rd prize: K250.00
 awards to each level

Send entries with full contact details including the name of your school and current grade to:
National Events Secretariat
 Morauta Haus, P.O. Box 639, WAIGANI, NCD.

Entry into the competition will be deemed as acceptance of the terms and conditions. The Judges' decision will be final
 All entries to be received by 25th August, 2000 no later than 4.00pm on the date.
 Winners will be notified by the National Events Secretariat.



• Oi lida na pipel bilong ples Kopo long Kabwum distrik i sikan na mekim wanbel wantaim memba Mista Saonu.

Is Timor lida i laikim ami

IS Timor:

Is Timor bai i mas gat wanpela ami bilong em yet taim em i kisim ful indipenden, lida bilong indipenden muvment long ailan Jose Alexandre Xanana Gusmao i tok.

Mista Gusmao i bin autim dispela toktok taim em i pinis olsem komanda long ol rebel paitman ami bilong em. Em i wokim dispela long soim long ples kliu olsem em i laik stap olsem wanpela man nating politisen

I gat bikpela bilip olsem Mista "Gusmao bai kamap olsem namba wan lida o presiden bilong Is Timor taim ailan i kisim indipendens. Na em i laikim kantri long i gat ami taim em i kisim ful indipenden long lukautim sekjurititi bilong kantri.

"Indipenden i no promisim sekjurititi," Mista Gusmao i bin tokim planti tausen pipel husat i bin bung long ples Aileu bilong makim 26 aniveseri stat long taim ol bin kirapim rebel ami.

I kam inap nau, hevi i wok long kamap namel long ol UN pis kipa na ol Timor paitman husat i sapotim ami bilong Indonesia. Ol i miks wantaim ol refuji na kam long hapsait boda namel long wes na Is Timor.

Ambaseda bilong Amerika long Jakarta Robert Gelbard i bin wokim strongpela toktok i luk olsem Is Timor inap long bungim bikpela pait sapos Indonesia i no wokim samting long stapim ol paitman i sapotim ami bilong ol long kalap i go long Is Timor.

Mafia kisim sas long bagrapim planti komputa

Manki ol i kolim long "Mafiaboi" husat i bagarapim planti ol kompyuta websait long Kanada na Amerika bai kisim sas long wokim samting i egen-sim lo, Federel Buria ov Investigesens (FBI) i tok.

"Mipela i laik toksave olsem ol lain husat i wokim dispela samting i no inap long hait moa baksait long foren kompyuta," Shawn Henry bos bilong FBI kompyuta investigesens i tok.

Manki ya i bilong Kanada tasol bikos em i yangpela tumas na aninit

long juvenai lo, ol no inap long autim nem bilong em. Em i kisim tupela sas pinis long bagarapim internet kompyuta bilong CNN televisen netwok na 64 narapela.

Plis i bin holim pasim em long mun Epril long Kanada na nau em i ken go long kalabus long tupela yia na peim A\$1,146.00 fain. Kot i no harim yet keis bilong manki ya tasol ol i putim tambu long en bilong noken yusim kompyuta bilong em long haus.

Papa dai bihain long pikinini go kalabus long kilim man

Australia:

OL i painim bodi bilong wanpela man ol i bin katimkatim i go pipia stret long haus bilong em bihainim wanpela toktok pikinini bilong em i bin mekim olsem em bai namba tri man em bai kilim dai.

Dispela yangpela man i bin go kalabus tasol bihain ol i painim papa bilong em i dai i stap long haus.

Yangpela man husat i go kalabus i kilim i dai tupela arapela man na tok olsem em bai kilim papa bilong em

yet namnba tri.

Yangpela i bin tok long taim bilong kot olsem dispela tupela man wei dai na papa bilong em yet i bin mekim pasin nogut long em na em i kilim tupela pinis na em i tokim papa bilong em olsem em bai kilim em tu.

Yangpela i toktok papa i save paitim em na mekim pasin nogut long em. Ol narapela manmeri i tok papa bilong yangpela man husat i go long kalabus i wanpela gupela man husat i save mekim gut long olgeta.



Amamas long senis...

• Ol pikinini meri bilong Presiden Abdurrahman Wahid bilong Indonesia i amamasim indipendens de long Presidensel pales long Jakarta. Papa i laik kamapim planti demokratik senis. Olpela presiden Suharto i no bin givim fridom long ol man na ami save kilim ol man nating. *Piksa: Weekend Australian niuspepa.*

George Speight i no lida tru long go pas long Fiji Ku

FIJI:

George Speight em i no lida tru bilong dispela ku we i kamap long Fiji sampela mun i go pinis we i bin rausim gavman bilong Chaundry. Dispela toktok i kam long wanpela bilong ol palamen memba husat George Speight i bin holim kalabus inap long 56 dei olgeta.

Poseci Bune, husat i Agrikalsa Minista long gavman ol i rausim i tok taim Mista Speight i laik kisim ol olsem kalabus, em i tokim ol olsem em i no lida bilong dispela samting na em bai wetim pastaim lida long kam.

Long wanpela toktok wantaim Fiji Sun niuspepa em i tok ol i bin wet inap 40 minat long larim Mista Speight i mekim sampela telepon kol na kisim sampela kol tu.

Em i wok long mekim ol kol na tokim ol long wankain taim olsem lida tru bilong dispela ku bai kam na em yet i wok man

nating tasol.

"Tasol bihain em i kisim narapela telepon kol, em tanim na tokim mipela olsem lida tru bai leit olsem na em bai tek ova olsem bos," Mista Bune i tok.

Mista Bune i tok olsem lida i no kamap i soim olsem wanpela bikpela samting tru i bin go rong long dispela tekova bilong gavman.

Em i tok sapos ol ami i sapotim Mista Speight, ating dispela lida truru inap long kamap tasol taim em i lukim olsem am: i no sapotim dispela tekova bilong gavman, lida tru i lusim Mista Speight long stap na karim olgeta hevi long dispela tekova plen bilong tupela.

Mista Bune i tok: "Taim dispela lida i no kamap olsem Mista Speight i tok, mipela save olsem wanpela bikpela samting tru i bin go rong na dispela kain hevi i bin kamap."

Em i tok taim ol i askim Mista

Speight long husat man i stap wantaim em, Mista Speight i bin tokim ol olsem i gat sampela bikpela man tru i stap insait long dispela muv em i mekim na ol memba husat i stap kalabus bai kirap nogut taim ol i lukim em.

Mista Bune i tok dispela ku em i wanpela ku we i bin i go rong tru na i no kamap long plen.

Long wankain taim, olgeta 12-pela man husat i bin stap wantaim em long dispela taim i sanap long kot long las wik.

Masgistret Temo i holim yet Mista Speight wantaim olgeta man long kalabus yet na bai ol i kamap gen long kot tumoro (Ogas 25).

Ol man bai kisim sas long wanem samting ol i mekim long dispela taim bilong ku na ol i bin givim baksait long kantri bilong ol na mekim dispela kain pasin bilong rausim gavman tru.



Redi long Sidni Olimpik Gem!

• (L-R) Ol dispela yangpela pilaia bilong Australia em Bronwyn Mayer na Daniel Marsden husat i save pilaim wata polo na ol swima Elka Graham, Brett Hawke na Kristen Thomson i trein hat long bikpela pilai we bai kamap long Sidni Australia neks mun. I gat 27 de tasol i stap bipo long bikpela wol pilai i stat. Ol dispela lain i soim sampela yunifom ol pilai manmeri bai werim long dispela bikpela gem. Wanpela kampani long Australia yet i kamapim disain na mekim dispela ol yunifom klos.

Piksa i kam long Weekend Australian niuspepa.

Meri kamapim bikpela stori long draivim trein we ol man tasol i save draivim

JAPAN:

Tupela meri i bin kamapim bikpela stori insait long Japan taim tupela i kontrolim ol fas trein insait long wol long nambawan taim.

Rumi Yamashita i pailotim wanpela trein ol kolim Shinkansen trein sevis na dispela tren ron bilong em i spit moa yet na ol man tasol i save long draivim ol dispela kain trein.

Miyuki Fukuzawa, 29 i narapela meri husat i draivim wankain trein long Trein Kampani Bullet Trein Sevis.

Tupela meri wantaim i bin kisim laisens bilong tupela long

wankain taim na stat draivim tren.

Bipo long dispela kankain draiva bilong trein i save man tasol na dispela em i nambawan taim tupela meri i go kamap pailotbilong trein.

Dispela trein i wankain olsem ol balus na tupela meri i olsem pailot.

Ol opisal bilong dispela ol trein i tok dispela em i wanpela bikpela samting long wanpela ples we ol mantasol i save bosim ol meri.

Dispela kain samting i kamap bihainim wanpela bung long 1997 we i orait long ol meri i ken

mekim dispela kain wok.

Mis Yamashita i kamap nambawan tren kondakta na nau dispela sem meri i kamap olsem pailot bilong ol tren we i save spit nogut tru.

Mis Yamashita i laik kamap Trein Draiva taim em i lukim sampela ol piksa bilong ol pikinini (katun) taim em yet i liklik meri.

Dispela i givim ting ting long em olsem em i mas kamap wanpela pailot bilong trein. Dispela samting i brukim rekot insait long Jepen yet we ol man i no save larim meri i mekim dispela kain wok.

WANTOK

NIUSPEPA BILONG YUMI OL PAPUA NIUGINI STRET

Politikel pati lo i gutpela

GAVMAN i strongim pinis namba bilong kamapim lo we i banisim ol politikel pati na ol memba bilong en insait long politikel sistem bilong kantri. Dispela lo i bilong mekim hat long ol memba i no ken kalap kalap long narapela pati igo i kam na tu ol bikpela pati i noken grisim o pullm ol memba i go long ol.

Dispela lo ol i kolim Intagrity ov Politikel Pati bai mekim hat tru long sampela pasin we i save kamap bipo long pasin bilong politiks insait long kantri. Na tu ol pati i mas pret long brukim dispela lo bikos ol bai kisim bikpela mekimsave long brukim lo insait long dispela lo.

Dispela em i wanpela gutpela lo bikos nau yumi save lukim olsem olgeta taim ol lida i save kamap minista na ol i gat pawa long makim ol lain bilong ol yet olsem bosman bilong wanpela dipatmen o siaman long wanpela kampani bilong gavman we mani bilong ol pipel istap long en.

Planti bikpela wok insait long kantri i no save ron gut bikos ol lida i save makim ol lain bilong ol yet long mekim ol wok i go isi long ol yet. Na long dispela as, planti mani tru bilong pipel i save lus nating long dispela kain pasin.

Narapela samting tu em planti pati i save kalap i go i kam taim ol i lukim olsem ol i lus long fomim gavman na ol i kalap lusim oposisen na go joinim gavman. Na dispela i save mekim hat tru long gavman i skelim wok long olgeta memba na ol memba i save pasim toktok hait long mekim guria gavman bikos gavman i no givim wanpela wok ministri o luksave long ol. Olsem na vot i nogat bilip i save kamap.

Taim vot i nogat bilip i kamap, gavman i save senis na planti gutpela polisi na projek we gavman i kamapim i save go na stop bikos nupela gavman i kisim ples na i laik kamapim plen na polisi bilong ol yet. Olsem na planti gutpela wok na developmen we inap go long pipel i no save kamap gut.

Praim Minista Sir Mekere Morauta i tokaut tu olsem taim dispela lo i kamap, em bai stapim ol memba insait long gavman sait long egensim ol bil o lo we gavman i laik kamapim. Olgeta i mas yesa tasol na pasim lo o kamapim wanem kain bikpela senis gavman i laik mekim kamap. Maski wanpela memba i sindaun long beksait (bekbensa) long gavman sait, em i mas sapatim olgeta gavman bil o wanem kain senis i kamap. Dispela i min olsem bai i nogat wanpela man i egensim wanpela samting gavman i laik kamapim bikos sapos wanpela memba i egensim, bai pati bilong em i raus na go sindaun long sait bilong oposisen.

Narapela gutpela samting tu long nupela lo em olsem wanem politikel pati i laik sanapim ol kendiet bilong em long ileksen, ol i mas bihainim sampela step pastaim long glasim na skelim man na makim ol. Na i no ken kisim man nating nating long laik na sanapim em olsem kendidet bilong nesanel ileksen.

Ating dispela nupela lo we i banisim ol politikel pati i gutpela na em i mas gat bikpela na strongpela mekimsave bilong en long husat wanwan memba o pati i brukim dispela lo.

Long taim bilong nesanel ileksen i save gat planti kain kain stail hevi i save kamap olsem na kain lo olsem i mas kamap bai i gat ol rait kendidet i sanap na winim ileksen long gutpela na stretpela rot tasol.

Oposisen i tokaut olsem ol bai givim sapat bilong ol long gavman long mekim kamap dispela nupela lo we i banisim ol politikel pati insait long kantri. Olsem na i luk olsem dispela lo i nogat hevi long kamap bikos namba i stap gut nau long pasim tasol dispela lo na mekim kamap.

Wenge strongim yet lo bilong pasin pamuk

• **MOROB**E Gavana Luther Wenge i tokat olsem em i bin askim long kamapim lo bilong oraitim pasin pamuk bikos dispela lo bai helpim ol gutpela manmeri long i no ken kisim ol sik nogut bilong AIDS. Husat manmeri i savem raun mekim nabaut i ken go het na dai long dispela sik nogut AIDS.

Mista Wenge i tok planti gutpela meri i save stap gut long haus wantaim famili tasol ol man bilong ol i save raun karim sik ya na bagarapim ol. Wankain tu i gat ol gutpela man i save stap tasol ol bikhet meri i save paulim ol na givim sik nogut ya long ol. Olsem na dispela bilong oraitim sik nogut ya i bilong banisim ol gutpela manmeri egensim dispela sik nogut AIDS. Em i askim ol sios long glasim gut dispela toktok na i no ken pairap tasol na egensim bikos long kristen pasin bilong mipela.

• **OL** Katolik meri i egensim tru toktok bilong palamen long kamapim lo bilong oraitim pasin pamuk insait long kantri.

Insait long wanpela petisen ol i givim long Minista bilong Hom Afeas na Yut Andrew Kumbakor i gat 7-pela strongpela toktok ol meri i autim;

• Lo i oraitim pasin pamuk bai i no inap long stapim sik AIDS long PNG bikos dispela sik i kamap pinis long kantri.

• PNG em i Kristen kantri na watpo bai

yumi kamapim kain lo olsem.

• Ol meri long PNG i no enimol, ol i mama bilong ol lida na ol pipel bilong kantri, watpo bai yumi semim ol long kamapim kain lo olsem.

• Olgeta lotu insait long kantri i mas mekim awenes o tok skul i go aut long olgeta pipel long lukaut long kain kai hevi bilong sik AIDS. Wanwan lotu i mas gat program bilong em.

• Ol meri i singaut long olgeta Kristen lida bilong gavman na ol kampani na komyuniti long luksave olsem sik AIDS i stap pinis na kamapim lo bilong oraitim pasin pamuk bai i no inap long stapim dispela sik. Awenes na gutpela skul em i wanpela rot bilong helpim ol pipel long abrusim dispela sik.

• Ol meri i askim gavman long lukluk nau long sapatim ol lotu long program bilong ol na givim mani na ol narapela helpim long mekim dispela wok.

• Ol Katolik meri i bung wantaim ol Engliken, Yunaitet, Luteran, Baptis, Selvesen Ami na ol Pentekostal na tok: Nogat long kamapim lo bilong oraitim pasin pamuk long Papua Niugini.

Pawa bilong prea em bikpela samting na ol meri i singaut long olgeta pipel bilong kantri long prea long stapim ol lida i pasim kain lo bilong oraitim pasin pamuk.

Presiden bilong Katolik meri long

OL HAP HAP

nius

Asdalosis bilong Mosbi, Misis Francisca Igo i givim dispela petisen pas long Minista Kumbakor.

• **OPOSISEN** i no amamas tru long pasin Nesanel Gavman i mekim long K1.5 milien Rurel Developmen Fan (EDF) bilong wanwan memba i go long distrik bilong ol. Dispela mani em bilong ol pipel long distrik na memba bilong ol em siaman bilong Distrik Plening na Baset Praioriti Komiti we i save skelim na brukim dispela mani bihainim ol projek bilong ol, Deputi lida bilong Oposisen Peter Peipul i autim dispela bel hevi.

Mista Peipul i tok ol i luksave olsem Wol Beng i go pas nau long skelim na holim dispela mani na i no Gavman bilong Papua Niugini. Bikos i gat sampela toksave i kamap pinis olsem ol pipel i ken aplai long mani aninit long Rurel Developmen opis long wanem projek ol i laik kamapim insait long distrik na ples bilong ol. Ol i ken pulapim pepa na givim long distrik edministreta long oraitim na salim i go long opis bilong Rurel Developmen.

Mista Peipul i tok dispela em K1.5 milien we wanwan memba i save go pas long sindaun wantaim distrik komiti na skelim long ol projek na wok bilong ples.

Em i tok i nogat wanpela rot we dispela mani bai paul bikos lo i tok distrik plening komiti i mas raitim ripot na soim ol projek bilong ol na bihain salim i go long Rurel Developmen opis we mani bai i kam bihainim.

Mista Peipul i lukim olsem Wol Beng i go pas nau long dispela samting na Gavman bilong PNG yet i no mekim wanpela samting long tingting na save bilong em. Olsem na sapos ol distrik i no yusim dispela mani, bai mani ya i go bek long han bilong Wol Beng.


• **MEMBA** bilong Mosbi Saut Ledi Carol Kidu i tok Praim Minista Sir Mekere Morauta i tok stret olsem politikel sistem bilong Nesanel Kapitel Distrik Komisnin (NCDC) i mas kamap gut pastaim long ol i rausim saspensen. Na dispela em bikpela wok NEC wantaim Minista bilong Provinsal Afeas long mekim hariap pastaim long ol i ken rausim saspensen long NCDC.

Nau yet NCDC i stap aninit long ol miks lo bilong 1995 Ogenik Lo na 1990 NCD Lo. Em i wanpela sistem we opis bilong Gavana i gat bikpela pawa tru na i no save yusim stret. Em i wanpela sistem we ol Lokol Level Gavman na Motu Koitabu Kaunsil i no save kisim gutpela baset na baset i no save go long ol bihainim taim na i nogat trupela pawa long ol Lokol Level Gavman i mekim wok bilong ol, Ledi Kidu i tok.

Ledi Kidu i tok sistem bilong NCDC i olsem sapos wanpela man i no sapatim politiks bilong ol bai ol i rausim em na mekim ilektoret bilong em i kisim bikpela hat taim long mari na ol sevis o developmen samting. Em i wanpela sistem we ron bilong mani i no go stret na sampela Komisina na ol politiks lain i save kisim strong long baset bilong NCDC long helpim ol sapat na pren bilong ol na ol yet tu wantaim.

Ledi Kidu i tok ol dispela toktok bilong em i gat rekot long sapatim we ol Komisina na politiks lain i save yusim mani long baset vot na ol komplek i bin kamap long em long 1999 long dispela.

Ledi Kidu i mekim dispela toktok long rausim ol komplek olsem Praim Minista Sir Mekere Morauta i bin mekim nek nogut long ol mama long ilektoret bilong em. Ledi Kidu i tok Sir Mekere i tok no tok long olgeta meri. Sir Mekere i bin tok olsem sampela lain i save kisim strong long NCDC na dispela toktok i bagarapim bel bilong ol meri bikos ol i tok ol i save wok hat na stap long strong bilong ol yet wantaim famili bilong ol.



Ol yangpela soim kalsa

• **Georgina Oa** pasim gut bilas bilong Samantha Kassman bipo long singsing. Ol yut bilong Katolik Sios insait long Mosbi i kamapim kalsa so na tupela meri ya i makim Sacred Heart sios long Hohola.

Poto: IVAN BAYAGAU.



• Ol susa lukaut long sket, nogut bai bruk ya. Gewa Raula na Lewa Vevao bilong Paramana i laik stapim ol pilaia bilong Telstars long kisim bal.



• Ol yangpela bilong Finpac ragbi union i soim yunifom bilong ol.



• Antap lephan: Wing defend bilong Paramana i autim bal long bikpela netbal salens egensim Telstars long Pot Mosbi.

• Antap raithan: Bikpela fowat bilong Souths Robert "Hitman" Tia i brukim difens bilong Waliya long primia lig gem long Pot Mosbi las wiken. Souths 34 winim Waliya 24. Souths bai bungim Brothers long gren fainel.



• Raithan: Stralka bilong Nomads (baksait) i putim was long birua pilaia bilong em long Pot Mosbi soka resis las wik.

• Lephon: Bara, noken tingting long givim siksti. Kain stail i kamap long Pom ragbi union.

Meri PNG winim Not Kwinslen skwas taitel

SKWAS RIPIOT

NAMBA wan meri long pilaia skwas (squash) insait long kantri Naluge Guy i winim Not Kwinslen wimen open taitel long Cairns, Australia, las wiken.

Meri Samarai ya i gat namba long wol renking taim em i kamap 32, na i save makim Papua Niugini long planti intanesenel skwas tonamen long Komenwelt, Osenia na tu Saut Pasifik Gems.

Guy husat i stap trening long Australia inap tripela wik long redim em yet long dispela tonamen. Em i winim anda 19 sem-pion bilong Australia,

Lisa Camelleri long tripela gem 9-6, 10-8 na 9-4 long winim dispela taitel.

Kosa bilong em Phil Cridge i tok olsem em i no difendim taitel bilong em long Lae bikos em i ting resis bilong skwas long Australia i bikpela moa bikos em bai salensim planti ol meri Australia.

Em i tok olsem em i no amamas tumas long gem bilong Guy bikos em i ken pilai moa gut long ol gem we em i pilai las wiken.

Cridge i tok namba tu gem ya i mekim em i pret liklik tasol Guy i paitim sampela gutpela hit we i pau-

tim yangpela meri Cairns na winim taitel.

Naluge nau i tingting long surkim mak bilong em long wok renking we em i bin pilai long WISPA tonamen long Wellington, Nu Silan long Julai na kamap long semi fainel.

Naluge nau bai go long Wangaratta long pilai long Victorian Open long pinis bilong dispela mun, na bihain bai stap long Melbourne long resis long Australian Open long mun Septemba.

Bihain long dispela mun yet, em bai go long Singapore na resis long Singapore Open tonamen.

Telstars bungim spes long grenfainel

NETBAL RIPIOT

BIKPELA gem bilong Pot Mosbi netbal i bin kamap namel long Lotto Telstars na Chevron Paramana long Sarere las wik.

Telstars i kamapim strongpela pilai long autim Paramana 51-48 long bukim namba wan spot bilong Pot Mosbi netbal grenfainel. Dispela grenfainel bai kamap long Septemba 2.

Maski Telstars i nogat gutpela golsuta olsem Jacklyn Niblet, ol i kamapim gutpela gem tru na singaut long sevis bilong longpela meri bilong Kerema, Mimi Ori, husat i mekim gutpela wok tru.

Paramana i gat gutpela sans yet long pilai long fainel taim ol i bungim Mermaids long eliminesen fainel long dispela wiken.

Na long arapela gem,

Mermaids i kamapim gutpela gem stret long rausim sket bilong ol BB Kings 54-40. BB Kings i gat laik long stap insait long fainel tasol ol i bungim rong tim stret ya.

Kila Karo wantaim Lua Mavara i kamapim gutpela gem long sut-ting eria long givim hat taim stret long birua bilong ol Tau Gabina na Turea Kwoupa. Ol tripela difenda ya Freda Lovare, Kapu Kapi na Ravu Ralai i bangim gut tru ol sut bilong BB Kings olsem Veiva Gure, Ali Ila na Vavine Aisi.

Tim ya i pilai strong tru tru wantaim Donna Lae na Winnie Mavara i lukautim senta pilai fil.


Insait long namba hap, Mermaids i lukautim gut gem na kisim planti gutpela bal long skorim poin. Long namba wan hap, skoa i sanap 30-19.

Long namba tri kwata, i bin gat senis we Walu Aua i senisim Aisi long wing atek na i kisim helpim bilong Raka Numa long setim ol suta bilong ol long skorim moa poin ya.

Veiva i wok long salim skin stret long traim helpim BB Kings i skorim moa poin tasol em i kisim bagarap long opening minit bilong namba tri kwata. Dispela i givim moa sans long Mermaids long putim moa poin.

Vavine Aisi i kisim ples bilong em na Kila Wari i kamap long wing difens. Ali Ila i wok hat tru long helpim tim i skorim moa poin tasol Mermaids i skorim planti poin na hat tru long holim ol ya.

Dispela wiken, Paramana bai bungim Mermaids long eliminesen fainel.



• Fulbek bilong Souths James Fova i rausim bal taim pilaia bilong Waliya i laik takolim em long Pot Mosbi priliminari fainel las wiken. Souths win 34-20. Foto: ISSAC IKUAVI.

Souths na Brothers bung long gren fainel

POM LIG RIPIOT

TOYOTA Brothers na Downer Construction Souths bai pilai long gren fainel bilong Pot Mosbi ragbi lig.

Tupela tim ya i winim priliminari fainel bilong egensim ol birua tim las wiken long Llyod Robson oval. Brothers autim Magani 24-12 na Souths i mekim save stret long Waliya 34-20.

Tupela tim wantaim bai gat tupela wik malolo bipo long bikpela gren fainel bilong tupela.

Menesmen bilong Pot Mosbi Ragbi Lig i surikim taim bikos ol i no laik ragbi lig fainel ya bai go wantaim bikpela NRL grenfainel i stap namel long Sydney City Roosters na Brisbane Broncos long dispela wiken.

Brothers i kam wantaim gutpela tingting long win. Orait ol i kamapim gutpela gem tru we i mekim na ol lain Magani i mekim lain drop-out kik.

Ol fowat bilong Brothers Sam Seniko, Kwara Arava, Moses Kuman, Catship Agesamo, John Yama na Willie Enoch i wok long kamapim gutpela pilai na skorim wanpela kona trai. Tasol referi i tok las pas i go long winga Paul Kamane em fowat.

Huka bilong Magani Colin Geno i traim hat tru long pulim tim long skorim trai tasol em i no kisim gutpela sapot long ol wan pilai bilong em.

Brothers i gat gutpela sans long kamapim poin taim ol i kisim tupela poin. Tasol kepten bilong

ol, winga Nelson Wanga i abrasim. Wanga ya em i save kisim kain stail bilong winga bilong Cronulla Sharks Steven Rogers.

Magani i no wari. Ol i kamapim gutpela pilai nau na Gerega Vaira i kisim bal na ran i go long skoa. Tasol taim em i kamap na sampela samting i kamap we Magani i kisim penalti kik.

Ol i no kikim penalti, ol i laikim trai na senta Ivan Turia i traim long skoa tasol difens bilong Brothers i strong tru.

Orait fulbek bilong Brothers Wilson Mavoko i kisim bal na winim 20 mita tasol em i lusim bal.

Dispela taim nau Vaira i kisim bal na setim riserv fowat Iru Pomu long skoa long go pas wantaim skoa 4-0.

Bihain long dispela trai, Brothers i kamap strongpela gem na putim fulstop long olgeta fowat bilong Magani. Orait hatwok bilong ol i karim kaikain taim fowat Yama i go skoa na Wanga i kikim konvesen na skoa nau i sanap 6-4 long sait bilong Brothers.

Tim bilong Robert Akunai i skorim arapela trai long surkim skoa i go long 10-4. Tasol fowat bilong Magani Vaira i les long ol Brothers i ranawe wantaim poin na em i putim arapela trai long mekim skoa i luk gut. Skoa long haptaim nau em Brothers 10, na Magani 8.

Insait long namba tu hap, Brothers i kambek na skorim tripela trai na Magani i putim wanpela tasol. Brothers nau skoa i go long 24 na Brothers em 12 tasol.

Kiunga i no klia sapos gem bai kamap o nogat

RAGBI LIG RIPIOT

RAGBI Lig sisen long Kiunga i wok long painim hevi taim fainel i wok long kamap klostu nau.

I bin nogat ragbi lig gem i kamap long Kiunga long las tu wik bikos long bikpela pait namel long ol piepl bilong Daru na Hailens. Ol i saspensim gem

bikos ol i ting dispela hevi bai kamap taim ol i pilai.

Na long dispela wiken, arapela samting bai kamap. Bikpela grenfainel bilong NRL namel long Sydney City Roosters na Brisbane Broncos.

Histori i soim pinis olsem taim bikpela gem bilong Australia o Nu Silan i kamap, planti ol

lain i no save kamap long lukim lokel gem. Na i luk olsem dispela Sande, Kiunga ragbi lig oval bai i nogat ol man stret.

Presiden bilong Kiunga Ragbi Lig Yangtem Katie i tokim Wantok olsem em bai kamap long fil sapos ol pipel bai kamap long pilai o lukim arapela bikpela gem. Em i tok

lokel kompetisen bai kamap sapos planti mani kamap long soim pes.

Dispela gem long dispela wiken em normal kompetisen we Niwaf Raiders bai bungim Kiunga Tigers. Na long namba tu gem, Airports Norths bai bungim Waliya. Sapos Norths i win em bai gat bikpela nois tru long fainel ya.

Kuno i kisim wok kosa bek

RAGBI LIG RIPIOT

ROYALS ragbi lig klab long Lae i rausim 4-pela wik saspensen bilong hetkosa Andrew Kuno na kisim bek.

Presiden bilong Royals Daniel Nandoma i tok olsem klab i bin saspensim em olsem hetkosa long em i bikhet na sampela kain hambak pasin. Em i bin stap olsem wanpela pilaia nating bilong klab.

Taim em i stap long saspensen, Agi Tete husat i het trena bilong klab i kamap olsem ekting kosa. Tasol nau Tete i lusim wok ekting kosa na kamap fultaim trena taim Kuno i kambek long klab.

Mista Nandoma i tok taim Kuno i stap olsem pilaia nating, klab i

putim was gut long em na bilip olsem em i senisim pasin na kisim em bek.

Kuno i tok em i amamas tru long kisim wok bek olsem kosa taim Royals i wok long traim stap insait long fainels. Royals i stap namba tri long poin lata bihain long Lae Spiders na Tarangau. JT Defence i stap namba foa ples long poin lata we LRFL bai statim fainel bilong ol.

"Olsem presiden, mi amamas tru olsem Kuno i kisim saspensen bilong em wantaim gutpela tingting na mi amamas long welkamim em bek long klab," Nandoma i tok.

Taim Kuno i stap olsem wanpela pilaia, em i gat bikpela nem tru long Lae na tu insait long Papua Niugini. Em i save pilaia seken

rowa na planti ol birua pilaia i save pretim em.

Em i bin kepten bilong Noten Zon, Lae Bombers na tu i makim PNG Kumuls long taim British Lions i kam raun insait long kantri.

Insait long arapela stori, Lae Ragbi Lig bai holim minor preliminary fainels long dispela wiken. Royals bai bungim Difens, na Spiders bai brukim bun wantaim Tarangau ragbi lig klab.

Ol arapela klab olsem KT Morobe Tigers, Panthers, Magani na Brothers i lus pinis na wet tasol long neks sisen.

Nandoma i tok sapos Royals i laik winim bek taitel, em i mas autim tiket bilong Difens long dispela wiken.



IKEN WOKIM GUTPELA SAMTING LONG YU

Mausman bilong FIFA kam long PNG

HENRY MORABANG i raitim

WANPELA mausman bilong FIFA bai kamap lukluk raun long Papua Niugini long dispela wiken.

Kathy Davani, sinia eksekutiv bilong Papua Niugini Futbol Asosiesen (PNGFA) i tokim Wantok olsem bikman bilong FIFA bai kam skelim ples pilai

sapos PNG i ken holim ol Wol Kap gem long hia.

Misis Davani i tok bikpela samting em opisel bilong FIFA ya bai lukluk long soka fil. Em bai sekim Sir John Guise stadium long Pot Mosbi na tu Sir Ignatius Kilage stadium long Lae sapos ol i ken tanim i go long soka fil.

Bihain long em i lukluk raun, em bai traim sapatim askim bilong

PNGFA long sampela helpim mani long wokim soka stadium.

Nau yet PNGFA i gat sans long kisim US\$4 milien i kam long FIFA aninit long Gol Projek. Ol projek i kamap aninit long dispela program i karamapim soka akademi (skul bilong soka) na soka stadium.

Sekretari bilong PNGFA Ivan Ngahan i mekim dispela toktok bihain long em wantaim

vais president Seth Daniel i go stap long wanpela miting bilong FIFA long Zurich.

Mista Ngahan i amamas tru olsem PNG i stenbai tasol long kisim dispela kain helpim i kam long wol soka bodi.

Lukluk raun bilong FIFA mausman ya bai tokaut sapos PNGFA i ken yusim mani long wokim stadium o nogat.

Futuro II kos kamap long Lae

SOKA RIPOT

PAPUA Niugini Futbol Asosiesen (PNGFA) bai holim wanpela FIFA edukesen program ol i kolim Futuro II long Lae.

Dispela program bai kamap sapos mausman bilong FIFA husat bai kamap tude long kantri long lukluk na skelim wok bilong PNGFA.

Edukesen program bilong FIFA em FIFA yet i sponsarim wantaim helpim i kam long Coca

Cola, PNGFA na ol memba asosiesen.

Futuro II bai karamapim 4-pela eria long wok bilong soka; edministresen, refereeing, kosing na sports medesin.

Jenerel Sekeretari bilong PNGFA Ivan Ngahan i tokaut olsem wanwan memba asosiesen i mas salim ol man husat ol i ting i ken mekim dispela wok long eria bilong edministresen, kosing na refering.

Na em i askim ol wanwan senta long salim tupela dokta

long skul bilong spot medicine.

Mista Ngahan i tok wanem ol asosiesen i laik givim nem i mas salim bipo long dispela wik Fraide we ol i ken kisim helpim.

Em i toktok strong olsem wanem ol asosiesen i no salim kwik long taim olsem long Fraide, em ol bai i no inap stap long dispela kos.

PNGFA bai tokaut long olgeta asosiesen sapos ol i kisim ol long s tap long dispela kos o nogat long namba wan de bilong mun Septemba.

Resis bilong winim maina primiasip i strong

TUPELA tim i wok long kamapim gutpela resis bilong maina primiasip em namel long ANZ Yunivesiti na Rapatona.

Bihain long 19 raun, Yunivesiti i go pas long poin lata long namba wan ples. Rapatona i stap long namba tu, na dispela i wok long kamapim gutpela salens tru long ol i mas winim gem long kisim dispela taitel.

Sapos wanem tim i winim maina primiasip bai makim Pot Mosbi long nesene klab sempionsip long Lae.

ANZ Yunivesiti bai bungim SP Brewery long traim winim ol na holim namba wan

posisen.

Ol boi bilong SP Brewery i sindaun tasol long namba tri ples lwantaim 39 poin. Sapos ol i win, dispela bai stapim Yunivesiti long surik i go moa.

Rapatona i gat gutpela sans yet. Em i wetim tasol Yunivesiti long lus, na ol bai kisim ples long namba wan ples.

Olsem wanpela olupela kosa i tok winim lig sempionsip em i bikpela samting. Olsem na tripela klab nau long Pot Mosbi, Yunivesiti, Rapatona na Cosmos i save bihanim dispela tingting.

Ol pilaia bilong ol i

save pilai strong tru long traim winim olgeta gem long wiken long winim dispela taitel.

Gem namel long Yunivesiti na SP Brewery bai wanpela gutpela gem stret. Ol boi bilong Yunivesiti i gat ol biknem pilaia olsem Hans "German" Gewambang, Ben Lakasa, Batman Furigi na Joe Aisa long go pas long ol yangpela pilaia.

Ol bai kisim sapat i kam long Ben Luluai na Rosen Matanga long beklain.

Yunivesiti i save kamapim gutpela gem stret long pilai soka na dispela ating bai pulim planti sapat long

Sande.

Na long Sarere, Cosmos na Rapatona bai skelim strong. Ol boi bilong Joe Turia na Francis Kupe long Cosmos i stap long namba faiv ples long poin lata. Sapos ol Rapatona i no was gut, man ol yangpela ya bai kisim ples ya.

Insait long arapela ol primia gem, Blu Kumuls bai autim Tawala long Sarere.

Na long Sande, Babaka bai skelim strong bilong Kurti Andra, IBS PS Yunaited bai nekum Wikila Tarangau na Guria i redi tasol long bomim Defence.

Telikom i strong yet

WIMENS SOKA RIPOT

NESENEL klab sempion Telikom bilong Pot Mosbi i soim olgeta pawa bilong em long holim yet namba wan ples long poin lata bilong Divisen wan bilong kik resis bilong ol meri.

Ol meri bilong Pheobe Rarabun i soim tru ol arapela klab olsem ol i strongpela tim insait long kantri taim ol i winim ANZ Yunivesiti long fainel bilong nesene klab sempionsip las mun.

Long lokal kompetisen long Pot Mosbi, Telikom i kamapim paia long olgeta wiken long nekum arapela tim.

Bihain long 16-pela gem, Telikom i winim 15 na lus long wanpela taim. Ol i skorim moa long 40 gol na birua tim i bekim tripela gol tasol. Dispela i soim tru olsem wanem tim i laik salensim Telikom i mas tingting gut.

Long dispela wik, Telikom bai

wimens soka, Orogen Anda 18 tim i go pas long poin lata wantaim 41 poin. Dispela tim ya em ol yanpela meri we skulbois soka i makim ol long makim Pot Mosbi long bikpela kik resis.

Wok bilong dispela tim em long tren wantaim long traim kamapim gutpela kombinesen long nesene trening skwat long bihain taim.

Long namba tu ples long divisen tu, em ol meri Rapatona. Ol susa ya i save long kik na ol i ken bagarapim tru sindaun bilong birua tim. Planti ol soka sapat i save laikim sapat bilong ol ya.


WMI tim i stap namba tri wantaim 35 poin. ANZ Yunivesiti husat i go pas long poin lata wantaim Telikom i kisim bikpela bagarap na sindaun long namba foa ples.

Cosmos i wok long surik i kam antap isi isi long poin lata ya.

Na long Divisen tu bilong wimens soka, Orogen Anda 18 tim i go pas long poin lata wantaim 41 poin. Dispela tim ya em ol yanpela meri we skulbois soka i makim ol long makim Pot Mosbi long bikpela kik resis.

Wok bilong dispela tim em long tren wantaim long traim kamapim gutpela kombinesen long nesene trening skwat long bihain taim.

Long namba tu ples long divisen tu, em ol meri Rapatona. Ol susa ya i save long kik na ol i ken bagarapim tru sindaun bilong birua tim. Planti ol soka sapat i save laikim sapat bilong ol ya.



Nogut lek i bruk!

• **Straika bilong Nomads (lephan) i traim long banisim bal long openen bilong em insait long namba wan divisen soka resis long Pot Mosbi las wiken.**

Lae bai holim nesene klab sempionsip

SOKA RIPOT

PAPUA Niugini Futbol Asosiesen (PNGFA) i makim pinis Lae olsem ples bilong holim nesene klab sempionsip long Independens wiken.

Sekretari bilong PNGFA Ivan Ngahan i autim dispela toktok bihain long sampela paul toktok olsem dispela sempionsip bai kamap long Pot Mosbi.

Mista Ngahan i tok Lae Futbol Asosiesen (LFA) na Lahi Soka Asosiesen (Lahi) bai go pas long holim dispela toname long Lae Futbol Pak na Sir Ignatius Kilage stadium we Lahi i save holim kik resis bilong en.

Dispela sempionsip em i bikpela samting tru bikos nau FIFA yet i askim sapos wanwan memba kantri i mas tokaut long sempion klab bipo long Januari 2001. Olsem na PNGFA bai holim long mun Septemba, na bihain wina bilong PNGFA nesene klab sempionsip bai makim kantri long Osenia Futbol Konfederesen (OFC) bipo long nupela yia.

Mista Ngahan i tok dispela yia nesene klab sempionsip FIFA i tro-moi bikpela mani long sapatim. Wina bilong OFC bai makim rijen long World Klab sempionsip we bai kamap long Spain long mun Ogas.

Sekretari i tok sempion klab na namba tu bai kisim prais. Bai i gat prais tu bilong namba tri na namba foa tim tu.

Dispela em i namba wan taim, PNGFA bai givim prais mani i go long ol klab husat i pinis long namba wan i go long namba foa.

Ol arapela tim i soim pes long sempionsip tu bai kisim tropi long

soim olsem ol i stap long 2000 nesene klab sempionsip.

Mista Ngahan i tok ol ogenaising komiti bai tingting long narapela ol prais sapos ol i skelim sapos i gat inap mani i kam long ol sponsa o long get.

Em i tok dispela sempionsip ya em i bikpela samting na wanem ol asosiesen i afiliet wantaim PNG Futbol Asosiesen i ken stap long en. Wanem tim i winim maina primia, na na namba tu bilong em, na sempion tim husat i win las yia i ken soim pes long dispela tonamen.

Wanem ol klab i laik stap long nesene klab sempionsip i mas gat dispela ol samting bipo long PNGFA i ken larim ol i kik;

a) Pas i kam long presiden bilong asosiesen we dispela klab i kam long em

b) Klab i mas baim K300 i go long pasbuk bilong PNGFA long ANZ Akaun 018 900 1109304.

c) bikpela samting tru em olgeta nominesen bilong klab sempionsip i mas kamap long opis bilong PNGFA bipo long Septemba 1.

PNGFA i makim tu tupela bikman bilong soka long LFA na Lahi long go pas long mekim dispela wok. John Peka i makim LFA na presiden bilong Lahi, Moses Demas yet i kisim sia long stretim ol samting long sait bilong Lahi.

Bihain long dispela PNGFA bai holim FIFA Edukesen Program - Futuro II long Lae yet.

Opening bilong dispela nesene klab sempionsip bai kamap long Rose Kekedo Convention Centre long Yunivesiti ov Teknoloji long Lae.



IKEN WOKIM GUTPELA SAMTING LONG YU



OTML Superannuation

LONG dispela yia, Ok Tedi Maining Supaenuesen Fan i bin givim 12 pe sen intares i go long ol memba bilong en.

Dispela mani em givim olsem win mani i go long ol memba bilong en i no bikpela tumas sapos yu skelim dispela wantaim 16 pe sen em ol i bin givim long ol memba bilong en long 1998. Tasol sapos yu skelim dispela wantaim mani em ol arapela supafan i save givim long ol memba bilong ol, yu bai luksave olsem dispela win mani i antap tru long ol arapela supafan.

Long nau we hevi NPF i bin bungim na gavman i tokim ol lain long wokim wok painimaut long painim as bilong dispela hevi, stori bilong OTML supafan i mas stap olsem wanpela stori we ol arapela supafan i mas lukim na traim long bihainim.

tru ol manmeri i ken tok olsem OTML supafan i no bikpela na i save lukautim tasol mani bilong ol wokmanmeri bilong ol yet tasol dispela i no bikpela samting.

Maski yu lukautim mani bilong ol wokman bilong planti kampani o bilong ol liklik lain we i save wok long wanpela kampani, bikpela samting em ol supafan i mas bihainim em wok ol i save wokim long lukautim mani bilong ol wokman meri bilong ol.

Ating ol i save traim long wokim bambai mani bilong ol



□ SIAMAN bilong Bod ov Trastis na Eksekutif Menesa Yumen Risoses, Mista Bill Ogilvie (hankais) sikhanim Mista James Pena long gutpela wok em i wokim bihain tasol long ol i tokaut olsem ol bai givim 12 pe sen win mani i go long ol memba bilong ol.

memba bilong ol kisim gutpela winmani? Sevis bilong ol i gutpela o nogat? Ol i gat gutpela rot bilong toksave long ol memba bilong ol wok bilong ol o nogat? Dispela em bikpela samting olgeta supafan i mas bihainim.

Taim ol i wokim dispela, ol memba bilong ol i bai amamas tru bilong wanem ol i save olsem mani bilong ol i stap gut na ol i ken kisim gutpela win mani.

Narapela samting em save bagarapim ol supafan em stap long sait bilong ol lain husat i save stap long bod. Taim ol i no givim gutpela advais o pusim ol menesmen bilong ol supafan long wokim ol samting em i no stret, ol hevi i ken kamap. Planti kain ol havi olsem i kamap pinis long ol supafan tasol OTML i no save bungim kain hevi olsem.

"Long mi yet, dispela kain samting i no save kamap. Ol bod ov trasti i save olsem mi inap wokim kain wok olsem gut na ol i save larim mi long wokim wok bilong mi," Mista James Pena, OTML Supaenuesen Fan menesa tok.

"Taim mi pilim olsem mi mas kisim halivim long ol bod long sampela samting, mi save go lukim ol."

Mista Pena tok taim OTML supafan i bin kamap long 1991 i kam inap nau, fan i wok long gro gut tru.

Mista Pena tok dispela i bin kamap bilong wanem ol i save putim ol mani bilong ol memba bilong i go insait long ol rot we ol i save bambai ol inap long kisim gutpela win mani long en.

Em tok main i no inap stap olgeta olsem na ol i save putim ol mani bilong ol i go insait long beng long kisim win mani. Mista Pena dispela rot bilong wokim mani i gutpela bilong wanem mani ino inap lus na tu ol supafan stil iken wokim mani yet.

"As bilong ol supafan em long lukautim mani bilong ol memba bilong ol. Olsem mipela mas noken traim long putim ol mani i go insait long ol bisnis samting we mipela save i no inap givim gutpela win mani o mipela i ken lusim mani bilong ol memba bilong mipela olgeta," Mista Pena tok.

Em tok laik bambai ol supafan i putim mani insait long ol gavman bond o wokim sot tem diposit long ol beng. Em tok long dispela rot, ol inap long kisim bek win mani inap long mak bilong 14-19 pe sen. Mista Pena tok dispela em mobeta.

Em tok taim ol supafan i putim mani bilong ol memba bilong ol i go insait long ol beng, planti mani bambai raun insait long ikonomi na ol gras rut manmeri inap long kisim long wokim ol kainkain wok.

Mista Pena i no gat arapela ol wokman meri husat i save halivim em long wokim wok bilong em. Em wan yet save wok. Em save kisim ol mani long ol wokman long olgeta potnait, ansarim askim bilong ol, redim mani bilong ol lain husat i pinis long wok, putim ol mani i go insait long ol rot we mani bilong ol i ken kisim win mani na stretim ripot bilong wanwan yia.

Antap long dispela, long wanwan potnait, em save toksave long ol wokman bilong Ok Tedi long amas mani ol i gat long akaun bilong ol long supafan.

"Mi laik bambai ol narapela supafan long toksave long ol memba bilong ol long wanwan potnait amas mani ol i gat na long wanwan krismas taim ol i kisim win mani, ol mas soim dispela tu long ol memba long ol pe paket bilong ol," Mista Pena tok.

Em tok dispela em wanpela gutpela rot tru bilong toksave long ol memba bilong ol long ol wok ol i wokim.

Mista Pena tok taim Ok Tedi main i pas, OTML Supafan bai skelim mani bilong olgeta memba bilong ol i go long ol na wanem samting em ol wokim long dispela mani em stap long ol yet. Sapos ol i laik joinim ol arapela supafan em laik bilong ol yet.



□ MISTA Pena wantaim meri bilong em long ai bilong haus bilong tupela long ples Ruti long Dei Kaunsol Eria long Westen Hailans. Mista Pena i bin wokim dispela 4-bedrum haus long mani em kisim long OTML supafan hausing skim.



Bilong wanem PEA Supaenuesen Fan i spesel...

- Fan Edministresen Sevis i gat olgeta samting long kompyuta na inap givim hariap olgeta ripot bilong ol memba long akaun.
- Gutpela Ritaimen Fan bilong ol sotpela na long pela taim memba.
- Karamapim laip bilong memba na ol famili bilong em inap em i gat 60 krismas.
- Karamapim laip bilong papamama.
- Long PNG, em i save givim ol medikel Sevis.
- Salim ol marasin o medikel sevis i kam long ol memba.

Askim mipela long moa toksave long telepon namba 325 3200 o salim fax long 325 3744. Mipela i gat rijinol opis tu long Lae na Maunt Hagen.

Ritaimen Fan bilong ol Woka.



MANI BILONG YU I WOK

Defence Force Retirement Benefit Fund (DFRBF) em namba tri bikpela supafan bihainim POSF na NPF long ol membasip bilong en. Dispela Fan i kamap bilong sevim ol ami sevisman tasol na Bod ov Trasti i lukautim. Het bilong Gavman i kamapim dispela ritaimen benefit na ol arapela skim bihainim lo we i sanap long dispela, Defence Force Retirement Benefit Act. Namba bilong ol memba i sanap nau olsem 5610 na 1081 em ol lain i stap long pensen na ol sampela mama we man bilong ol i dai pinis.

Bod i save mekim mani long ol dispela eria:

- a) Kontribusen bilong ol memba
- b) Mani i kam long Gavman aninit long lo
- c) Mani i go insait long Fan aninit long Defence Force (PNG) Retirement Benefit Act 1973 of Australia
- d) Mani i kam long ol invesmen bilong dispela lo.

Long bihainim lo na long strongim wok i ron stret na gutpela na menesim gut dispela opis Gavman i kamapim. Bod ov Trasti i mas lukim olsem ol invesmen disisen i gutpela na stret bihainim lo na bihainim gutpela fainensel menesmen na komesel prektis.

Bod ov Trasti i gat bikpela wok tu long lukautim gut dispela Fan bilong ol memba.

Defence Force Retirement Benefit Board i bin putim ol mani bilong em insait long ol dispela invesmen eria:

- 1) Ol Gavman Sekyuriti
- 2) Tams Dipoisits (win mani i kam long benk)
- 3) Komesel Ekwitis (baim sea insait long ol bisnis)
- 4) Komesel Lons (ol bisnis dinau)
- 5) Ol Propetis (ol haus na graun)

Bod i gat wok bihainim lo long putim mani bilong ol memba i go long ol wok bisnis bilong pulim ol win mani. Mak bilong ol mani i save kam bek i olse 12% tasol nau DFRBF i apim dispela mak i go antap long 14% na dispela mak bai i stap olsem inap long pinis bilong yia 2000.

Long Epril 30, 2000. Bod i gat mani mak olsem K76 milien. (Fainel odit i no yet)

Bod i save laik putim mani i go insait long ol nupela invesmen tasol ol i mas skelim na glasim gut pastaim ol invesmen insait long kantri pastaim.

Insait long invesmen piksa bilong Defence Force Retirement Benefit Bod, yu ken lukim klia olsem mani bilong ol memba i no was tasol long sekyuriti bilong ol ami na famili bilong ol long bihainim taim tasol. Em i kirapim ol wok na arapela soci-economic helpim long ol arapela Papua Niugini manmeri tu.

Bod ov Trastis, Menesmen Tim na ol membas, DFRBF i amamas olsem ol i sapatim tu long kirapim dispela kantri. Olsem na mipela i tok, DFRBF i mekim na i gutpela long ol pipel bilong mipela.

Givim wan ten long God

LONG stia tok "A 2000" sosaeti ibin tok olsem, narapela hap bilong wok kamap bilong sosaeti long yia 2000, em long lukluk long kirapim na strongim bilip bilong ol memba long sanap strong long pasin bilong bringim igo bek, na givim igo long haus bilong God; hap moni insait long ol bisnis oa moni ol sosaeti memba i save mekim.

Dispela em long Wan Ten o Tait na Ofa. Dispela em wanpela has tingting na toktok bilong God Papa; we man na meri bilong graon bai bihaenim. God i tok olsem, "Long olgeta samting na moni man na meri i mekim, bai bringim bek igo long Haus Lotu bilong God." "Wan Ten o Tait", na Peim Ofa. Long taem man na meri i mekim dispela pasin: ol soim olsem ol i harim na laikim tru tok bilong God. Tu; ol soim hamamas bilon gol igo long God; long olgeta blesing God oi kap-saitim antap long haus na famili bilong dispela man na meri.

Long strongim dispela tok God i toklong Malakai sapta tri (3) ves ten (10) na ileven (11) olsem: Yupela imas tilim olgeta samting bilong yupela long 10-pela hap na bringim wanpela hap long haus bilong mi. Yupela mekim dispela bai ol wokman bilong mi bai gat kaikai. Yupela i mekim olsem; bai mi givim planti gutpela samting long yupela i noken sot. Bihaenim dispela rot na bai yupela i ken sav eolsem tok bilong mi em tru olgeta. Ves ileven(11) i tok olsem: Yupela imekim olsem; bai mi pasim ol binatang bai ol i noken bagarapim ol gaden bilong yupela.

Na ol pikinini diwai bilong kaikai; na olgeta kaikai yupela planim long giraon; bai kamap gut, karim gut kaikai; na kaikai bai pulap tru long ol gaden bilong yupela.

God i mekim dispela tok long wanem; Em yet i Papa bilong dispela graon wantaem olgeta samting istap insait long en. God yet i tokim King Solomon long raitim long Buk Song (Sams) sapta tuentifo ves wan (1). Antap long dispela tok, God i tokim king Solomon long raitim dispela narapela hap tok long sapta naentisiks (96) ves eit (8) olsem: "Bikpela emi namba wan olsem na yupela i litimapi biknem bilong en.

Yupela i mas bringim ofa na go long haus bilong en antap long dispela. God i tokim gen King Solomon long raitim Buk Song long Sapta wan hundred (100) ves tri (3) olsem: "Yupela i noken tingting lus long bikpela, em wanpela tasol i God tru

em wanpela tasol i bin wokim yumi, olsem na yumi bilong em yet."

Buk Baibel long Malakai sapta tri (3) ves tri (3) igo long ves eit (18): I tok aut tu long stil pasin bilong yumi; we yumi wok long stil long God long ol Wan Ten o Tait yumi no save bringim igo back long Haus bilong God; na tu long ofa yumi no save givim igo long sios long Haus Lotu bilong God

Narapela tok lukaut long pasin bilong stilim moni bilong God: stap long Hagai sapta wan (1) ves faef (5) igo long ves ileven (11). Sampela taem yumi save kisim bikpela bagarap long san na ren. Kaikai long gaden i save bagarap; tasol yumi wok long wokabaut na stap olsem ol ai pas man meri yumi no save luksave long tok tok bilong God insait long ol dispela hevi yumi save painim olsem graon i bagarap. Hagai i tok klia long dispela long buk Baibel long traem na mekim yumi long luksave long sin pasin bilong yumi; tasol planti man meri wok long wokabaut olsem ol i long long. Ol i no luksave; na traem long senism stil pasin bilong ol.

Tok promis long ol man meri husat i wokim gutpela na stretpela pasin; na tu long gutpela pasin long bringim na givim igo long Haus Lotu na Sios bilong God; Wan Ten o Tait na Ofa long dispela tok. Bai i gat bikpela senis insait long ol komuniti sapos ol man meri i ken luksave long God em i wanem kain man, na harim na bihainim tok bilong em.

Menismen bilong Morobe Savings na Loan Sosaeti i gat strongpela bilip olsem; sapos ol memba na pipol long provins na kantri olgeta i givim laip trutru bilong ol igo long han bilong God; na bihainim olgeta tok istap long buk Baibel; na bringim bek igo long Haus Lotu bilong God; Wan Ten o Tait na givim Ofa; olgeta wok bisnis bilong ol man na meri long provins na kantri bai kamap gut. God yet i promis, bai em i mekim dispela, sapos yumi harim, bihainim na mekim olsem em i tok.

Tok piksa long man na meri bringim Tait na Ofa i olsem; John i kisim pei olsem K285.60 gross Wan Ten o Tait em bai K28.56: em ken putim Ofa long tok tenk yu long God long blesing em i kisim; long laik na bel kirap bilong em: antap long dispela Wan Ten i bringim igo long Haus Lotu. Em i ken givim K2.00; K5.00 o antap moa long dispela K28.56 Wan Ten o Tait: olsem Ofa.



• Taim ol supafan i lukautim mani gut, ol memba maski ol i dai o stap inap long lukim kaikai bilong mani em ol i gat insait long fan. Ol sem long dispela poto we ol famili bilong wanpela memba bilong PNGTA i kisim mani bilong ol.

Toktok bilong dinau

PLANTI askim na toktok i wok long kamap long pasim na wei bilong nupela Sevings na Lons Sosaeti long Morobe Provins i wok long mekim.

Planti pipel i wok long hama- mas olsem na ol i wok long pulamapim aplikeisen pepa bilong ol long kisim dinau na wan tu tasol ol i kisim moni na wok- about i go long mekim wok bilong ol.

Ol i no save wet long planti wik na mun na kisim dinau olsem ol i save mekim long ol bikpela benk. Na tu ol bikpela benk i no save givim dinau long ol kastoma bilong ol sapos dinau moni ol i askim long en i wan kain olsem moni ol i gat long benk.

Sampela manmeri i wok long askim long wanem taim bai Morobe Sevings na Lons Sosaeti bai apim mak bilong kisim dinau.

Ansa bai mipela givim long dispela tok piksa:- i olsem:- nau yet sapos memba i putim K600 na em i bin kisim dinau mani long K600; orait nau wanem taim bai

Sosaeti i litimapim mak bilong kisim dinau: olsem sevings i sanap long K600 na dinau bai sanap olsem K1,200 na antap moa long dispela mak long wan (1) wan (1).

Sosaeti i laik tok klia long ol memba na ol man meri husat i laik kamap memba long Morobe Sevings na Lon Sosaeti, olsem:-


Sosaeti i wok long wokabaut yet long wok developmen o mekim ol wok long mekim na kamapim Sosaeti bai bikpela. Laip bilong dispela wok bai i moa long faiv-pela (5) yia bihain taim; stat long dispela yia 2000 na bai go pinis long yia 2005.

Sapos yu laik kisim moa tok- save long dispela plis yu noken surik long ringim

Telefon: 472 1777

Feks: 472 1778

o rait i kam long Morobe Savings & Loans Society P.O Box 568, LAE, Morobe Province



Sevim Mani wantaim MOROBE SEVINGS NA LON SOSAITI

Sapos yu laik kisim dinau insait long dispela nupela taim

- Baim skul fi bilong ol pikinini
- Baim haus sik na marasin
- Mani bilong holide
- Mani bilong baim ol samting long wokim haus

0

- Bisnis projek yu laik statim.

Inap yu kam lukim mipela hariap nogut taim i pinis.

Mipela i stap long Vele Rumana Biding long Graun Floa.

**P. O. Box 3488
Fourth Street, LAE**

**Telepon: 472 1777
Fax: 472 1778**



Ritaiamen Benefit Fan

PUBLIC Employees Association Superannuation Fund i bin kamap long 1989 long halivim ol pablik sevan husat ino nap kisim halivim long gavaman fan skim Public Officers Superannuation Fund.

Ol dispela lain en ol marit meri na ol lain husat save wok hap taim olsem ol klina long ol pablik sekta.

Inap nau yet em i wanpela oganaisasen husat save givim supa-anueisen, ritaiamen na insurens benefit long 10,000 manmeri na ol pravit sekta wok manmeri long Papua Niugini.

Public Employees Association (PEA) save pait long rait bilong ol wok manmeri, na save wari long wanem i nogat laip ol medikol insurens sevis bilong dispela wok manmeri insait long pravit sekta husat save wok long ol liklik Papua Niugini bisnis.

Ol wok manmeri bilong ol pravit sekta

Ol wok manmeri bilong ol pravit sekta oganaisasen inap long kisim ol benefit olsem ol narapela wok manmeri long pablik sekta. PEA Superannuation Fund i no long taim i go pinis i toksave long halivim ol wok manmeri long PNG bai ol i gat gutpela laipstail wantaim wanem liklik moni ol i gat.

Dispela toksave i kam long taim planti oganaisasen i wok long pravitaisim kampani bilong ol na long taim ol wok manmeri wok long amamas long ol benefit bilong ol long PEA Superannuation Fund skim. PEA Superannuation Fund siaman Napoleon Liosi i tok insurens i olsem wanpela samting yumi olgeta i mas gat. Helt na moni bilong baim ol fi bilong haus sik save stap long han bilong ol wok manmeri na sampela taim liklik or nogat halivim save kam long ol bos bilong ol. Olsem na em i bikpela samting sapos PEA Superannuation Fund i wok gut bai ol wok manmeri long ol pravit ol pablik sekta i kisim gutpela intares. Dispela em i bikpela toktok long taim laip ekspektensi i wok long go daun na laipstail na wei bilong kaikai i wok long senis hariap tru.

Long dispela toksave Mista Liosi i tok olsem laip na helt insurens i kamap bikpela samting long PNG.

Insurens

"Laip na helt insurens em bikpela samting tasol i no ol bikman tasol inap long kisim, ol manmeri long Papua Niugini inap long kisim tu long dispela program. PEA Superannuation Fund i salensim ol bos manmeri long halivim ol wok manmeri na sapos tim ol long bihainim ol dispela skim.

PEA Superannuation Fund i bin kamap 10-pela yia i go pinis long halivim ol pablik sevan husat i no stap long Public Officers Superannuation Fund medicare na helt insurens skim. Dispela em bilong halivim ol marit meri na ol manmeri husat i wok hap taim tasol.

Sans bilong invesmen

Ol wok manmeri bilong Papua Niugini save wok na ol i mas sevim sampela moni. Em wanpela samting ol wok manmeri i save painim hat tru long wokim.

Siaman i tok long dispela taim we moni em i hat tru long painim, yumi mas sindaun na skelim wanem samting i bikpela na wanem samting i liklik. "Laipstail bilong nau em hat tru na planti wok manmeri i wok long wokim o grup skim long halivim ol yet.

PEA Superannuation Fund em wanpela skim we em i givim sans na invesmen moni bilong ol wantaim ol benefit bilong ol. Nau yet ol wan wan wok manmeri wok long painim hat tru long sevim na investim moni long baim ol samting olsem ol medikol na skul fi.

"Long nau yet i gat wei long sevim moni long taim yu pinisim wok na long dispela taim tu karamapim medikol eskpens, skul fi na ol narapela samting," siaman i tok.

Public Employees Association Superannuation Fund em ritaiamen benefit skim, na tu em i halivim long laip na helt insurens bilong ol memba. Long nau yet i gat olsem 10,000 memba long olgeta hap long PNG, wantaim ol opis bilong PEA long Pot Mosbi, Maunt Hagen na Lae.

"Tingim ol helty wok manmeri em ol gutpela wok manmeri."

KWIK BUILT LOW COST KIT HOMES



**PNG's Nambawan
Kit Home
Manufacturer**

All enquiries can be directed to the Kithouse Hotline
or call into your nearest Steamships Hardware Store.

Phone: 472 5218 Fax: 472 5217

YU KISIM

WEI?




Steamships HARDWARE

WALCAMA	LILA	SARAU	KODIPO	MT. HAGEN	GOROKA	MARAKA	MEKERA	PAPOA-NEIYA	ALGUA	KAYLUM
325 6755	472 4100	982 1400	982 8940	524 1754	732 2308	852 3117	854 2657	219 2705	641 0133	984 2744

Home Loans


Bank South Pacific





Kisim haus bilong yu.

With the lowest
home loan interest rate
in Papua New Guinea.

Contact your nearest Branch today to apply



Bank South Pacific



• Westercoc inap helpim yu long stretim haus bilong yu maski yu stap long ples.

Haus bikpela samting

THEO THOMAS i raitim

WANPELA bikpela samting long laip bilong yumi ol manmeri em haus. Tasol long sampela hap bilong graun, planti ol manmeri i no save i gat haus long silip. Long Papua Niugini, mipela i laki bilong wanem mipela i gat ol planti diwai na rop na kunai samting bilong wokim haus.

Tasol long nau yet wanpela senis em wok long kamap isi isi em long tingting bilong ol manmeri. Planti lain long nau i laik wokim haus kapa na i no moa tingting long wokim haus long ol samting bilong bus. Dispela tingting i wok long kamap bikpela bilong wanem ol manmeri i luksave pinis olsem haus kapa i strong moa, ino inap long long sting na i ken stap longpela taim tru.

Dispela i wokim na planti manmeri i laik wokim ol haus kapa tasol.

Sampela ol bisnis i wok long kamap long wokim bambai dispela hevi bilong wokim haus kapa i liklik em ol kain kampani olsem ol bilding hadwe, ol konstraksen kampani, na ol beng na ol narapela kain bisnis olsem. Dispela ol bisnis igat wanwan rot ol i gat bilong halivim ol manmeri husat i laik wokim haus.

Wanpela kain stail ol kampani i bihainim em long wokim ol haus pinis na brukim na putim stap. Taim ol manmeri i laikim kain haus, ol kam askim tasol long stail ol laikim long en na ol i givim haus em ol wokim pinis tasol i brukim na putim i stap. Sampela ol kampani husat i save wokim kain kit om o haus olsem em Mitre, Steamships Hardware, Northern District Sawmilling and Timber Kampani, Bowmans, PNG Forest Products, Westercoc na sampela arapela moa.


Mitre i gat ol haus olsem hausik, klasrum, opis na ol haus silip bilong ol skul mangi we ol i wokim pinis na brukim na redim i stap.

Ol beng em ol narapela hap we ol manmeri i ken go lukim long kisim halivim long wokim haus. Ol i gat ol kain lon bilong wokim haus stret na sapos yu go lukim ol, ol i bai amamas tasol long halivim yu.

Sampela bilong ol beng i pasim tok wantaim ol bikpela gavman dipatmen na kampani na i save wokim samting ol kolim long hausing skim.

Ol kain rot olsem i stap na i save wokim pasin bilong wokim haus i isi liklik long ol manmeri.

Sapos nogat, ating mipela bai kilim skin yet long ol haus kunai o morata.



• Kain stail haus bilong ol Westercoc.




Mighty Good, Mighty Affordable, Mitre Homes

VILLAGE HOMES or REMOTE AID POST, DOUBLE CLASSROOM or FAMILY HOMES, DORMITORIES or HEALTH CENTRES, LARGE FAMILY or SMALL FAMILY, COASTAL or HIGHLANDS, MITRE HOMES are MIGHTY GOOD



Let Mitre Homes manufacture a kit home for you. Easy to erect with wide range of options for now or easily added later. Easily transported to your site throughout PNG

Mitre Homes meet the requirements of most financial lending organisations.

To find out just how easy and affordable it is to own your home give the Mitre Homes team a call on



Lae
Phone: 472 4881
Fax : 472 4894
Port Moresby
Phone: 325 8133
Fax : 311 2120



Kumu i toktok long bel



BIPO wanpela man na meri bilong em i kam bek long Bomai, ol i kolim Amia long hap bilong Gumine Sab provins. Nem bilong man em Olini na meri em Dimaima. Tupela i kisim planti samting olsem karuka, marita na sampela tu i kam long dispela taim.

Long taim tupela i kam namel long bus, Olini i tokim Dimaina long wetim em antap long maunten ol i kolim Dimukul. Olini i go long katim rop bilong wokim banis, olsem na meri bilong em Dimaima wet i go tasol ai bilong em i raun. Nau em i lukim wanpela naispela haus i stap, na i gat planti kumu i stap arere long haus tu. Dimaima i aigris nogut tru olsem na em i go klostu long dispela haus.

Long dispela haus i gat wanpela lapun meri i stap. Lapun meri ya i lukim Dimaima na tok, meri husat i tokim yu kam long hia. Na Dimaima i bekim tok, mi kam long slip na bai mi go bek ong tumora. Lapun meri ya i amamas tru long wanem em i laik kilim Dimaina na kaikaim em.

Long taim em i tudak nau, lapun meri ya i redim ol spia na bihain em i go kisim kumu long gaden. Lapun ya i kukim kumu na givim long Dimaima, tasol Dimaima i pilim swit tru na aigris



moa yet olsem na em i pinisim olgeta kumu.

Long nait nau taim Dimaima i laik slip em i lukluk i go antap na lukim spia. Taim em i lukim spia bilong kilim man, em i kirap na tok, mi laik go long toilet. Dimaima i kisim liklik sit paia na i go olgeta long rot na i go pinis long Maunten Oimukul.

Lapun meri ya i ting Dimaima i stap yet long toilet, tasol nogat em i go pinis. Nau lapun ya i kisim spia na fan i go long kilim Dimaima na em i singaut, kumu. Na kumu insait long bel bilong Dimaima i tok yes long wanem, kumu bilong lapun i stap innait long bel bilong Dimaima.

Bel bilong Dimaima i tok yes, i go i go taim lapun meri ya i singaut kumu. Dimaima i go pinis na i kamap long ples Mul na autim stori bilong lapun meri ya long Olini. Olini i seksek nogut tru long lapun meri ya, na taim em i kam klostu Olini i katim nek bilong lapun meri na em i dai.

Nau long dispela taim, ol man na meri i save go i kam long dispela rot long Bomai. Em long wanem, lapun meri ya i dai pinis.

Kobila Kaupa,
Gumine, Simbu provins.

Moa toktok long bekim wari bilong Confused, Unhappy na Divided we Laiplain i bin prinim pas bilong ol.



Dia OL PREN,

Long PNG ol papamama i save laikim ol pikinini meri bilong ol i maritim wanples man o man bilong ples klostu bikos ol i save gut long ol na tu ol i gat gupela pren pasin namel long ol.

Dispela em bikos ol papamama i bilip olsem ol pikinini meri i stap klostu long lewa bilong ol, winim ol pikinini man. Taim papamama i sik pikinini meri i save lukautim ol, kukim kaikai na brukim na kisim paiauwut i go long ol. Em bai sempasin sapos ol arapela lain i helpim ol na antap long em, famili i mas baim ol ausait lain husat i kam help wantaim ol kaikai na ol arapela samting.

Papamama i wari tu olsem sapos pikinini i maritim man bilong man narapela hap, em bai ino inap save long pasin kastam bilong ol. Tok piksa em taro em bikpela kaikai long ol pipel bilong yu na yu amamas long planin na groim. Tasol sapos yu maritim wanpela man we saksak em kaikai tru bilong em, em bai no pilim

gut tumas wantaim ol lain bilong yu. Na man bai ting wanem samting sapos yu no save long kukim kaikai tru bilong em.

Taim tupela yangpela i gat strongpela laik long wanpela arapela, ol arapela samting olsem kaikai em ol no bisi long em. Tasol laik bilong yumi long kaikai em i strongpela tru, winim planti ol arapela laik. Yumi save tingim kaikai long olgeta de na sapos yumi no wanbel long en, em i ken bagarapim marit bilong yumi.

Tasol wantaim edukesen sistem long kantri, ol yangpela pipel i kam long ol arapela hap bilong kantri i save bung na skul wantaim long ol kolis, yunivesitihai, skul na wanem hap moa. Ol yangpela i save bung, gat bikpela laik long wanpela arapela na wokim prenpasin.

Na maski ol papamama i laik stapim pikinini i maritim long narapela hap, em i hat. Taim papamama na ol arapela moa i egensim prensip bilong ol, ol save strong moa na tanim baksait olgeta long ol famili bilong ol.

Polisi bilong gavman long bungim ol pipel bilong dispela kantri wantaim i ken go gut na i no bagarapim plen bilong ol papamama husat i laikim pikinini meri i maritim long ples yet bilong ol. Maritim long ples yet bilong yu em i helpim long lukautim na holim pas kalsa na dispela tu i wanpela samting we gavman i laik strongim.

Yunitori o pasin bilong bung wantaim namel long ol pipel bilong narapela provins i no min olsem ol i mas maritim. Wan wan provins na wan pasin i ken lukautim kalsa bilong en na em i ken stap olsem hap bilong kantri. Long stap yunaitet i no min olsem yumi i mas kamap wankain. Yu ken painim

sampela gupela toktok long Baibel long ol dispela ves: Korin Ves 12 sapa 12-31. Santu paul i bin givim skul olsem Sios i bung wantaim tasol planti narakain pipel i wokim ol samting long narakain rot. Dispela i wankain tu long kantri.

Long sait bilong Divided we meri bilong em i laik stap wantaim papamama, em i ken kamap long ol lain wanples i maritim tasol man i wok ausait long taun o long narapela provins. Tasol taim man i bilong narapela provins, hevi bai bikpela moa. Meri i no stap wantaim ol lain bilong man bikos ol no baim meri yet? O ol papamama i lapun na sik na pikinini meri i mas stap wantaim ol na lukautim ol?

Tru meri i gat wok long lukautim papamama, em i mas givim bikpela luksave tu long man bilong em taim em i maritim.

Sapos papamama bilong tupela maritim i stap longwe long wanpela arapela, i moa gupela long ol i raun lukim ol long sampela taim. Sapos meri i go em yet long lukim papamama, i moabeta long i no stap longpela taim. Sapos em i save go lukim ol planti taim, sampela taim em i ken lusim ol pikinini wantaim papa bilong ol.

Las em stia tok i go long ol yangpela olsem i moabeta ol i tingting gut pastaim bipo ol i maritim man o meri bilong narapela hap we kastam na pasin tumbuna i narakain. I moabeta long tupela i toktok wantaim long ol hevi we i ken kamap, go long ples na kisim gupela toktok long ol papamama na ol hauslain bipo ol i maritim.

Laiplain

Nem: Mongz Paki
Krismas: 19 (man)
Adres: C/- Grace Paki, Mt Hagen General Hospital, P.O. Box 36, Mt Hagen, WHP.
Save laikim: Watchim TV, sain raiting, pul long kanu long Sepik wara, rait long pen pren, wanpela raitpela meri long Madang o Sepik yet long poromanim.



Nem: James Wura
Krismas: 28 (man)
Adres: Mulkuna Elementary School, P.O. Box 800, Mt Hagen, WHP.
Save laikim: Pilai ragbi tas, Lukim gem na go piknik long wara.

Nem: Unitex Conzi
Krismas: 19 (man)
Adres: Aitape Vocational Training Institute, P.O. Box 34, Aitape, Sandaun Province.
Save laikim: Harim musik, pilai wantaim ol pren na mekim pen pren.

Nem: Stanlee Kapout
Krismas: 16 (man)
Adres: Aitape Vocational Training Institute, P.O. Box 34, Aitape, Sandaun Province.
Save laikim: Pilai soka, harim gospol musik na wetim ol gupela pen pren long raitim pas i go na i kam wantaim.

Nem: Albert Ason
Krismas: 18 (man)
Adres: Aitape Vocational Training Institute, P.O. Box 34, Aitape, Sandaun Province.
Save laikim: Pilai spot, bekim pas na mekim pren wantaim ol lain bilong narapela ples.

Nem: Junia Pajic
Krismas: 18 (man)
Adres: Aitape Vocational Training Institute, P.O. Box 34, Aitape, Sandaun Province.
Save laikim: Pilai spot, watchim video, harim musik na mekim pen pren.

Nem: Samuel Aloyse
Krismas: 21 (man)
Adres: Mainland, Holdings, P.O. Box 196, Lae.
Save laikim: Gospol musik, serim toktok bilong papa God, lukim pilai raun, waswas long nambis, raitim pas long pen pren.

Nem: Jimmy Rueben
Krismas: 19 (man)
Adres: Mainland Holdings, P.O. Box 196, Lae, MP.
Save laikim: Gospol musik, lukim EMTV, raun wantaim poroman, na raitim pas long pen pren.

Nem: Herman Kusak
Krismas: 14 (man)
Adres: Utmei High School, P.O. Box 1015, Rabaul, ENBP, PNG.
Save laikim: Stadim ol Jacaranda skul atlas long osen, kontinent, populesen, deset, ailan, na ol samting i stap raunim yumi long wol.

Nem: Evelyn Yawai
Krismas: 13 (meri)
Adres: Gagibu Primary School, P.O. Box 131, Finchhafen, Lae, Morobe Province.
Save laikim: Harim musik, lukim TV, pilai soka na kaikai rais wantaim spegetti, kumu na Besta tomato tinpis.

Nem: Joyce Peter
Krismas: 17 (meri)
Adres: Pambil Primary School, P.O. Box 352, Mt Hagen, WHP.
Save laikim: Go long lotu, pilai gems, lukim TV, harim ol hit singsing.

Nem: Issac Hapeli
Krismas: 16 (man)
Adres: Lomi Trading, P.O. Box 499, Maprik, ESP.
Save laikim: Go raun wantaim ol pren, pilai gita, soka na go lotu na mi promis long bekim pas sapos mi kisim.

Nem: Peter Porowe
Krismas: 19 (man)
Adres: P O Box 282, Waigani, NCD.
Save laikim: Olgeta manmeri, harim tok, serim kaikai, mekim pren. Raun lukim ples, pren wantaim ol yangpela manmeri

Nem: Michael Kondi Yakumbu
Krismas: 13 (man)
Adres: Kero Primary School, P O Box 22, lalibu, SHP.
Save laikim: Lukim narapela ples, kaikai rais wantaim pis, mekim pren, helpim papmama, go skul na lukautim bebi brata na kamapim nupela pren na raitim pas i go i kam.

KANAGE



long trausis bilong kaunsil. Neks minit ol manmeri i laik lukluk daunbilo long lek bilong Kanage. Man ol i paul long lukim retpela graun malumalu i pundaun long as na kapsait i go daun long lek bilong kaunsil bilong ol. Kaunsil Kanage i sem pipia stret na i no moa soim pes long ol pipel bilong em.

**Willie Mono
Lae**

Kanage em bilong Simbu provins. Em wanpela man bilong sem stret. Long wanpela Fraide paps Kanage i kisim liklik boi bilong em Torokondo na tupela i go spin long Kundiawa taun. Tupela tekov long moning taim na go long taun. Man long dispela taim em potnait Fraide na ol manmeri i no isi isi long taun ya. Orait tupela raun i go na trangau liklik Tonokondo ya pispis kilim em stret. Em i kirap tasol na tokim paps Kanage olsem, "papa mi laik pispis ya." Kanage harim tasol na wokabaut yet bikos ol manmeri i pulap stret na em i sem long toktok long liklik boi bilong em. Nau liklik Tonokondo em ting paps Kanage em i no harim so dispela taim em singaut strong na tok, "Papa mi laik pispis ya!" Em nau olgeta manmeri i harim na tromoi ai i go long paps Kanage wantaim liklik Tonokondo. Kanage em sem pipia stret na pulim liklik man ya long nek bilong em i go long wanpela kona na i krosim em nogut tru na tokim em olsem. Ol man stap na yu singaut antap long mi na mi sem ya. Sapos neks taim yu laik pispis yu mas tok papa mi laik singsing ya. Liklik Tonokondo i harim pinis na long apinun tupela i go bak long haus. Long dispela taim sampela wantok bilong Kanage tu kam stap long haus bilong em. Orait ol i kaikai pinis na long aninit ol i slip. Paps Kanage i slip wantaim liklik boi bilong em. Long biknait tru pispis kilim liklik Tonokondo na em i kirap. Em i pret long tokim paps Kanage olsem em laik pispis so em kirap tasol na tok, papa mi laik singsing ya. Sori paps Kanage lus tingting olgeta olsem boi ya laik pispis. Ai slip wantaim tokim liklik Tonokondo olsem. Ol man slip ya, sapos yu laik singsing kam singsing isi tasol long iau bilong mi. Liklik baga ya i kirap tasol i go na putim liklik brata bilong em long iau bilong paps Kanage na pispis i go insait. Trangau baga ya ting em driman tasol nogat ya. Em tru hot wara i boil insait long iau ya.

**John Kabane
Kundiawa**

Kanage bilong Is Sepik provins tasol em i go wok long wanpela sekyuriti sevis long Mosbi. Em i wok i go na bos i pinisim em long wok na givim pinis pe bilong em. Kanage kisim pinis mani bilong em na em tingting long go long ples bilong em long Sepik na em i go bukim tiket bilong em. Taim em bukim sit bilong Air Niugini pinis ol tokim long tumoro bai em kisim balus. Kanage i go kamap long ol pren bilong em na tokim ol olsem tumoro bai mi go long ples, kam yumi go spak i go inap tumoro yupela salim mi long balus. Orait Kanage wantaim ol pren bilong em i go spak. Ol spak i go na klostu 6 kilok na ol bringim Kanage i go long eapot long wanem Kanage bai kisim balus long 6 kilok moning. Ol singaut na ol pasindia i go kalap long balus. Kanage i go kalap long balus na balus i tekov. Taim balus i stap namel long Mosbi na Lae eahostes i bringim sof dring na liklik bisket long ol pasindia. Kanage i hangre nogut tru na em i pinisim sof dring na liklik bisket hariap tru. Tasol em i no pulap, em hangre moa yet. Olsem na em singaut i go long eahostes. "Hey, wantok meri dispela kaikai yu givim mi, mi kaikai na mi nau pulap. I gat sampela kol rais bilong aste i stap tu o. Eahostes i harim na em i no wanbel, olsem na bekim toktok bilong Kanage olsem, yu longlong o mipela i no save kukim rais insait long balus. Olgeta pasindia i harim na kilim lap insait long balus.

**Pius Karum
Vanimo**

Kanage bilong Wosara long Sepik na em marit long meri Wali. Wanpela taim em wantaim tambu stori i stap na em stori long taim em i go long Sydney. Em toktok long tambu olsem long Inglis. From Madang we flew, flew to Lae, Lae was just like Madang. From Lae we flew, flew to Mosbi, Mosbi was just like Lae from Mosbi we flew to Sydney, Sydney was paradise na tambu tokim em any more stori. Na Kanage tokim tambu olsem hold on not finish yet, na em stori. In Sydney we went to the disko place all the people were dancing away. When my faveret musik on, my legs were on melodi, girls maski tekim another one, tambu harim ol haphap Inglis bilong tambu em kilim skin stret long lap.

**Kobi Sumuma
Waigani**

Kanage bilong boda long

Telefomin long Sandaun. Ol yangpela manki long ples save holim disko na Kanage save laik tru long go tasol em save pretim Misis bilong en. Long wanpela nait Kanage tokim Misis olsem em i go painim kapul na em tekov long gutpela pul mun stret. Tasol baga saitim kona, haitim spia, bunara na kamap long disko ples. Na i no wet em stailim stret long sait. Long haus Misis Kanage tingting planti bikos Kanage i no man bilong painim abus. Olsem na em senisim em yet na stailim gut stret na tekov long luk stil long danis ples. Em go luk stil ya rait olgeta Kanage mekim save long kona i stap. Misis Kanage i no wet em kirap givim stret long sait na olgeta bai kam long en. Kanage tu lukim na surikim em yet liklik na danis klostu long en. I no long taim Kanage askim laik long en tasol Misis tanim nek na tokim em husat i no save long yu. Yu traipela marit man ya. Tasol Kanage aut stret long en na wok long askim laik long en i go bihain musik na meri ya tok orait na Kanage i no wet em tekov wantaim nupela meri long haus. Long haus em tokim meri ya long wet ausait na em i go wokim paia insait long kitsen. Tasol Misis go insait long haus slip na senis hariap gen na go wet i stap ausait na Kanage wokim paia pinis na singaut isi kam na Misis i no wet wantaim bikpela smail em i no save soim long Kanage bipo ya em kisim long pes na go insait na tokim em "mi lovim yu lewa, long yu long maritim mi namba 2 taim gen." Kanage lukim olsem em sem pipia na tekov long nait.

**Chris M. Marco
Vanimo**

Kanage bilong Hanuabada wanpela les man stret, oltaim save stap long haus na spai long ol meri taim ol save go toilet. Mekim i go na pinisim olgeta meri long ples. Long wanpela taim long nait Kanage lukim wanpela kiktos na hariap tru em kalap i go daun long wara na supim i go pas long toilet na spai i stap. Sem taim man bilong meri lukim olsem na em tu kalap isi tasol go daun long wara na supim bihainim Kanage taim em kamap long toilet em lukim Kanage spai long meri bilong em i stap. Man em belhat nogut tru na laik apim sutim hai takol long Kanage insait long wara. Taim man bilong meri apim Kanage apsait daun. Kanage save olsem em trabol nau na em stap isi tasol. Taim em apim Kanage em pilim olsem sap naip i pas long nek bilong em. Sori man ya apim Kanage wantaim na singaut olsem mi tok yu lusim naip yu

lusim naip na yumi pait long han samting tru em manki bilong Kanage sanap na pas long nek bilong man ya.

**Uncle Eddie
Wewak**

Bikman Kanage bilong ples Mare long Makam Wampar. Na em raun wantaim ol manki long nait painim abus aninit long saksak ples tais san na wara i drai na momot i no isi. Ol i lodim tru, momot, kapul, bus paul na blakbokis ol i sutim ong diwai bikus na planti i pundaun na wanpela i stap antap long diwai. Nau bikmoning Kanage na 3-pela polo i go bek na sekim blakbois tasol i no pundaun. Nau Kanage i go antap long diwai bikbus nau long het bilong diwai klostu long blakbois 3-pela polo singaut. Kanage, traipela snek moran i kam antap bihainim yu. Baga painim hat nau na em kalap saksak na snek i bihainim yet nau em traime go daun long saksak nogat em han lus na pundaun na hap idai slip i stap. Nau tupela polo i go hap mail long kisim wara long givim Kanage narapela polo was long em i go na em singaut strong tru giamanim Kanage. Kanage yu kirap snek moran i kalap na bihainim yu. Aste yet Kanage jet kirap givim siksti i go abrusim tupela polo na go pinis long ples. Tripela polo kilim ol yet long lap. Ol i kam stori ong ples Mare, man ol manmeri na pikinini lap i dai tru.

**Kanage Pren
Boroko**

Kanage bilong ples Sambai insait long Is Sepik provins. Long dispela ples Sambai i gat ples balus bilong misin. Kanage em man long ples em i no save long Inglis. Wanpela taim Kanage wantaim bebi tumbuna bilong em i go long ples balus long lukim ol waitman i kam long balus. Em nau ol waitman i kam daun long balus. Kanage i holim tumbuna bilong em na lukluk i stap em nau wanpela waitman i kam long sait bilong Kanage na i holim han bilong bebi tumbuna bilong Kanage na askim Kanage long tok Inglis olsem whose baby is it? Kanage bekim mi baby waitman paul na i askim gen whose baby it it? Kanage i kirap na tok masta mi tok yu wanem mi baby. Taim ol manmeri i lap long Kanage. Kanage i ting em i Inglis gut olsem na em i so op stret.

**Paul Kenang
Angoram**

Kanage em bilong Sepik Wara long Angoram stret. Na em save
• I go moa long pes 26

CATCH THE ACTION!

SP CUP

OUR GAME

P.N.G.R.F.L.

SP CUP

KANAGE



• I kam long pes 25

sekyuriti long Angoram Helt Senta. Man em i no yangpela man, lapun ya tasol pes bilong tromoi tok pisin na kain ol eksen nogut long ol mama save kam kisim marasin. Em save ekting olsem A.P.O stret taim ol i no stap, em save givim sut na marasin long ol sik meri. Ol man em save les. Na taim ol kros long em, em i no bisi pes tu bilong tromoim tokpisin na kolim belhat bilong ol man. Wanpela fotnait wik Fraide, em wok nait pinis na long Sarere moning em go long Angoram maket. Ai bilong em tu wok long slip na em tu em pes bilong kaikai tapiok mumu stret. Na em lukim wanpela pes bilong haiwe i salim tapiok mumu stap. Na em askim em. "Susa hamas long mumu tapiok bilong yu." Na em tok K1.00 tasol na Kanage tromoi han long poket long kisim K1.00. Tasol boi i kamautim mitnait kauboi long poket na tromoi long kisim mumu tasol em lukim hariap na tok sori long susa ya na tok. "Em samting bilong was long hangre bilong mi.

Bench Hem
Angoram

Kanage em bilong Bogia, tasol em i go raun long Karkar Ailan na stap long hap. Wanpela taim em kam raun long nambis klostu long Waglon plantesen. Em nau tupela waitman, man na meri kam kamap long em. Tupela, em ol lain bilong tanim ol tokples ol kolim SIL. Na ol tok, "apinun tru papa. Yu

bilong we?" Kanage kirap na tok, "Mi bilong hia tasol strongpela manki long bik ples." Na i askim em, "inap yu kolim nem bilong ol sampela samting long tokples Karkar?" Na Kanage em tok Okay.

Em nau Kanage kisim buai, daka, na kambang na em tok. "Buai long tokples em jeb, kambang long tokples em kau, daka long tokples em ful, tasol long Inglis mi no save, ol sampela man save kolim ol daksas." Man Kanage tokim waitman olsem na waitman em paul tru long harim. Taim waitman i kisim diksineri buk bilong em long painim dispela hap tok "daksas." Das manki, Kanage em lus wantaim bodi. Waitman tanim long lukim paps Kanage em i no stap moa wantaim tupela. Em nau waitman em tok, "tru, tru, tru em i no asples man, em strongpela manki long bikples olsem na em lus wantaim bodi.

John Dee Wavnada
Bogia

Kanage bilong Simbu na em save wok olsem wanpela foremen bilong boila long Pukpuk fam long 8 Mail. Wanpela taim

em wok i stap na tingting ples i kisim em. Em tingim tambu bilong em, em wokabaut i go long haus na tokim meri bilong em. "Mi go long opis, mi laik ringim tambu bilong mi long ples." Taim em i go long opis liklik bebi bilong em i kra. Kanage kisim liklik bebi wantaim na go long opis.

Taim Kanage i go sanap long ai bilong waitman, waitman ya i lukluk strong long Kanage na askim em yu gat wari. Kanage tokim bos inap mi ring, waitman ya tokim em telipon i stap. Kanage wantaim bebi bilong em i stat long ring. Taim Kanage ring i go na tambu bilong em bilong em toktok wantaim em tupela mekim save toktok i go, kam amamas nogut tru tokples pinis nating em holim bebi bilong em long rait han bilong em, taim tupela toktok yet bebi bilong Kanage sem taim pekpek i kam daun.

Kanage lukim olsem taim telipon i stap yet long maus bilong Kanage em kirap na tokim bebi bilong em, yu stupit. Taim tambu bilong em harim olsem, em mas ting olsem tambu Kanage i mas krosim em ya. Em lusim telipon na go long haus na tingting mi toktok gut wantaim Kanage, mi no pinisim gut toktok yet na em tok stupit long mi. Kanage tu em wari nogut tru na lusim opis na wokabaut i go lusim bebi long haus.

Samuel Malasan Aloyse
Lae

Kanage em bilong Ramba rot long Mt Hagen. Wanpela taim em wantaim poro bilong em pikim kopi na kisim mani na stap

long ples. Long wanpela fotnait wik Fraide, wanpela skul tisa i kisim pas mani na laik go pilai kas wantaim Kanage na poro bilong em. Taim bilong pilai poro bilong em wantaim tisa i pilai kas na Kanage i stap boskru long poro. Pinis long pilai tisa i lusim olgeta pas mani bilong em. Taim tisa laik go em askim K2.00 tasol long poro bilong Kanage long baim bas bilong em long go long haus.

Em askim faiv pela taim na poro bilong Kanage i no givim na tisa i tok, "Anyway forget it," na em kirap na go. Poro paul na tingting planti i go na askim Kanage. Kanage kirap na tokim poro olsem yu wanpela pik long ples. Tisa krosim yu nogut long tok Inglis na yu no laik bekim sem toktok long em. Poro i belhat na siksti i go na tokim tisa olsem, "Anyway forget it." Na tisa i lap na tekov.

Michael Pato Wimp
Mt Hagen

Kanage em wanpela boi Kandrian. Wanpela taim em i kisim Airlink balus i kam pundaun long Hoskins eapot. Orait em i kisim bas rout 3 na tekov i go long Kimbe. Trangu em pes taim tu ya long lukim taun olsem na em i go insait long haus kaikai i stap.

Na yu save plawa pis i swit na Kanage i les long wokim hap i pundaun olsem na бага i kaikai i go na Kanage i laik kisim dring long dring. Na han bilong em i wokim na traipela hap pis plawa i pundaun na бага i lukluk long ol meri save wok long haus kaikai, nau isi isi tru han bilong бага i go daun long kisim hap pis i pundaun na ol meri i wok long haus

kaikai i singaut. "Papa just leave it alone." Na бага i tok ples na em tok olsem. "Tavom wa na ngo." Na meri ya i tok Inglis na askim paps, "Can you repeating you question again.?" Na бага i kros nogut tru na em i kaikai tit bilong em na em i tokim meri ya long bruk Inglis na em i tok, "Hey! Hey! susa you know that I am coming with leaves of Malas. Na meri ya i tok. "Your face looks like Malas." Na Kanage i kisim hi-filings na em i tokim ol man-meri insait long haus kaikai olsem. "Meri i mas dai pinis long mi ya," na em i smail na tekov.

Paul Kumbo
Kandrian

Kanage i nogat wok na i go bek long ples na meri bilong em i stap wok long taun wantaim bikpela susa bilong Kanage long Papindo stua long Lae. Tripela wik olgeta na Kanage i no kaikai lam flaps na kakaruk. Em i kaikai taro na kaukau i go na em i les pinis. Na em i raitim wanpela pas i kam long meri bilong em na tok olsem daring yu kisim potnait pe na kaikai lam flaps na kakaruk plis lewa noken lusim tingting long mi.

Mit bilong em yu kaikai na bun tasol em putim long wanpela pas na salim i kam na mi i smelim tasol na tromoi i go. Na Kanage i tingim tasol na i stap long het bilong em. Em orait lewa ples em mi bosim sapos yu kam bai mi bekim dinau na mi kaikai olgeta mit bilong yu na bun bilong yu bai yu karamapim long laplap na karim i go bek long wok bilong yu.

Anauya Jembok
Lae



WOK BISNIS
MANDE IGO FRAIDE
8.am Igo 5.pm spinun

WANTOK
KLASIFAID TELIPON : 325 2500

ADVATAISIN SEILS
Mirri Alort: ext 214 Walter D. Edward :ext 218
John Iagata: ext 217

TOK SORI


PABLIK NOTIS

Menesmen na ol wokmanmeri bilong Word Publishing Kampani i salim bikpela tok sori na wari i go long meri Idau, ol pikinini na ol famili memba long dai bilong

KARL PITI

long las wik Sarere.

*Sol bilong em i ken
kisim gutpela malolo*



**WORD PUBLISHING
COMPANY LIMITED**



PNG Teachers Savings and Loan Society Limited
A member of the Federation of Savings and Loans Societies Ltd.

NOTIS

Long makim ol Bod na Menesmen bilong Sosaiti, mi laik toksave long olgeta memba bilong Tisa Medical Insurance Scheme olsem bikos long bikpela kos bilong ronim menesmen na edministresen bilong dispela opis, potnait pe mani yu save putim long dispela skim bai go antap long K6.00. Bipo em K4.00.

Tisa Medical Insurance scheme bai go het yet long givim yu gutpela medikel insurens na wok strong yet long mekim dispela medikel skim i kamap gutpela moa long sevim gut ol memba bilong en.

Long sampela taim i kam nau, Society i bin toktok gut pinis long kisim gutpela servis na helpim aninit long Tisa Medical Scheme. Olsem na ol dispela gutpela helpim na ol gutpela samting we i kamap bai i go long ol memba.

Long kisim moa save long dispela, toktok wantaim ol dispela opis.

The Loans Manager

PNG Teachers Savings & Loan Society Ltd.
PO Box 6037, Boroko, NCD, Phone: 235 7599, Fax: 325 7679

The Regional Manager

PNG Teachers Savings & Loans Society Ltd, PO Box 1333, Rabaul. ENBP, Phone: 982 8256,
Fax: 982 8255

The Regional Manager

PNG Teachers Savings & Loan Society Ltd, PO Box 787, Mt Hagen. WHP
Phone: 542 2733, Fax: 542 1367

The Regional Manager

PNG Teachers Savings & Loan Society Ltd.
PO Box 1186, Lae. MP, Phone: 472 4368, Fax: 472 5819

**ANDREW IMAROTO
GENERAL MANAGER**



Department of Lands and Physical Planning



NOTIS BILONG ASKIM OL LAIN I LONG BAIM HAUS

Dipatmen nau i salim pinis notis bilong Demand for Payments (yelo cad) long husat pipel i sindaun long haus bilong gavman na i no stretim yet pe bilong haus long las 6-pela mun.



Dispela em long toksave olsem mak bilong mani bai kamap aninit long fofit i go long Stet sapos ol i no stretim dispela insait long wanpela mun.

Dipatmen bai stat long fofitim ol haus long Septemba 2000.

Olsem lisholda i mas baim pe bilong haus maski yu kisim notis o nogat. Sapos yu gat sampela mani i stap yet egensim haus bilong yu, yu mas kam na stretim so haus bilong yu bai i no inap fofit i go long stet (gavaman).

Sapos yu gat save askim, ringim Revenue Opis 301 3199 or 301 3202


**GUAO K. ZURENUOC, OBE
Sekretari**



Moa piksa bilong Mini Olimpik Gem long Gordon IEA





WANTOK SPOT



PNGRFL rausim gem long Enga

... Gavana Ipatas i kros

HENRY MORABANG i raitim

PAPUA Niugini Ragbi Futbal Lig (PNGRFL) i rausim gem namel long Enga Mioks na Rabaul Guria long Wabag na givim i go long Lae.

Dispela gem namel long maina primia Enga Mioks na Rabaul i sapos long kamap long Enga tasol PNGRFL i tingting planti tumas long laip bilong ol pilaia na givim gem i go long Lae.

Siaman bilong SP Kap komiti Jim Robins i mekim dispela toktok long ol niusman long Pot Mosbi olsem sekuriti o laip bilong ol wanwan pilaia na opisel i bikipela samting tru. Ol i no laik givim gem we ol ragbi lig pilaia bai tingting long laip bilong ol na i no pilai gut.

Dispela tingting bilong rausim gem long Wabag i mekim Gavana bilong Enga Peter Ipatas i kaskas na em i paia long PNGRFL. Em i tokim PNGRFL olsem ol i no save helpim long strongim wok bilong ragbi lig insait long kantri.

Gavana Ipatas i tromoi bikipela mani bilong Enga Provinsal Gavman long sapotim Enga Mioks long stap insait long 2000 SP Kap resis. Gavana Ipatas tu i go pas long sponsorin Simbu Warriors.

Mista Robins i tok em i sori long rausim gem long Wabag. Em i save olsem Gavana Ipatas i tromoi bikipela mani long helpim na strong ragbi lig insait long hailens na Enga provins.

Tasol Gavana Ipatas i mas tingim laip bilong ol pilaia.

Watpo SP Kap Komiti i rausim gem em bikos long sekuriti bilong ol wanwan pilaia husat bai stap long trening skwat bilong wol kap. Nesenel Kosa Bob Bennett husat i bin stap long Wabag tupela wik i go pinis i no amamas tumas long pilai graun bilong Aipos Oval.

Mista Robins i tok Bennett i ting olsem graun bilong ol i strong olsem kolta na i ken bagarapim skin bilong ol pilaia.

Arapela ol risen watpo ol i rausim gem em;

- sekuriti bilong ol pilaia em

bikipela samting. Pasin bilong fainels i save kamapim sampela belpen namel long ol sapota na dispela i ken bagarapim sampela ol gutpela pilaia.

• Tupela tim wantaim i mas amamas. Na ol i mas kamapim gutpela na strongpela gem long namel ples.

• Pe bilong salim o karim tupela tim i go wantaim i bikipela samting. PNGRFL i nogat bikipela mani tumas long karim ol pilaia i go i kam.

• Arapela samting ples pilai. Aipos Oval i nogat gutpela banis long kisim mani. Na Lae Ragbi Lig i winim Wabag bikos em i gat gutpela kapa banis i banisim ragbi lig oval we ol i ken kisim mani.

Mista Robins i tok long gem i bin kamap long Wabag tupela wik i go pinis, PNGRFL i no wokim bikipela mani. Em i lusim K6,000 bikos planti man i no baim get na kamap long lukim pilai.

Arapela samting tu, las wik long Mendi, PNGRFL i lusim K8,000 bikos wanpela politisen i givim tok orait long ol man long lusim dua na samting klostu olsem 1200 sapota i kam insait fri long lukim gem namel long Enga Mioks na Mendi Muruks.

Siaman i tok SP Kap komiti i tok-tok wantaim ol sapota bilong Wabag na tu siaman bilong Enga Mioks Johnson Siki husat i amamas long tingting na bai bungim Rabaul Guria long Lae.

"I tru Siki i wari long ol sapot bilong ol pilaia, tasol ol bai givim olgeta samting long winim Guria," Robins i tok.

PNGRFL na SP Kap Komiti i tok-tok pinis wantaim ol plis fos long Lae long putim ekstra ol plisman na tu ol sekuriti long lukautim dispela gem nogut ol trabel bilong pait i kamap.

Long bekim toktok bilong PNGRFL i no developim ol ples pilai, Mista Robins i tok olsem PNGRFL i gat sampela ragbi fil we em i gat lis long en olsem Pot Mosbi, Lae, Mt Hagen na Mendi we em i ken.



• Huka bilong Souths John Pandia (pes i kam long kamera) i laik rausim bal long pilaia bilong Waliya taim ol bung long priliminari fainel bilong Pot Mosbi ragbi lig. Souths win 34-20. Foto: ISSAC IKUAVI.

Fong holim wok yet olsem siaman

NESENEL Eksekutiv Kaunsil (NEC) i makim gen Bernard Fong long holim wok siaman bilong PNG Spots Komisn long narapela tripela yia.

NEC tu i makim Sam Piniau na tu olpela hupbek bilong Kumul na bisnisman Ifisoe Segeyaro long narapela tripela yia gen.

Piniau i bin stap wantaim PNGSC Bot long stat bilong 1992, na Fong na Ifisegeyaro i stap tupela term nau olsem memba.

Insait long dispela miting bilong NEC, ol i makim tu presi-

den bilong PNG Basketball Federesen Robert Kopaol olsem wanpela bod memba.

Kopaol i kisim ples bilong Alex Bailey bilong Coca Cola husat i lusim kantri na gobek long Australia.

Eksekutiv director bilong PNG Spot Komisn, John Kambuou i tok welkam long Mista Kopaol husat bai yusim save bilong em na eksperiens bilong em long strongim wok bilong Komisn olsem bod memba.

"Olsem yu save, Komisn i save taitim bun long wok bikos em i no save kisim gutpela sapot mani long baset long karim aut wok bilong em.

"Mipela gat wok long mekim na wantaim yu (Kopaol), mipela i ken train long painim we long mekim Komisn i kamap strong," Kambuou i tok.

Arapela memba bilong PNGSC em lamo Launa, Joseph Sukwianomb na Presiden bilong PNG Sports Federation Henry Kila.

Em i Gutpela Em i Tuna Em i bilong PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.



OFFICE OF RURAL DEVELOPMENT

P.O. Box 1100
WAIGANI N.C.D.


Phone: 328 8380 Fax: 328 8007

Year 2000

district development

program grants

Year 2000 district development program grants



The Government of Papua New Guinea is committed to improving the way we live in rural areas by developing and funding projects which are aimed at providing a better standard of living.

Each Open Member of our National Parliament will be identifying, in conjunction with provincial and district administration and their community, eligible development projects that are needed most throughout their area.

K89 million has been allocated evenly to the 89 electoral districts under the Year 2000 District Development Program. The Office of Rural Development will administer the implementation of these Government funded projects that will benefit our local communities in every District of Papua New Guinea.


The types of eligible projects to be funded to improve our Rural Transport are

- ✓ Feeder roads
- ✓ Bridges
- ✓ Airstrips
- ✓ Wharves



To improve our Rural Health

- ✓ Aid posts and clinics
- ✓ Rural water supply
- ✓ Health worker housing




To improve Rural Education for our children:

- ✓ Elementary and Primary classrooms
- ✓ Educational staff housing

and to improve our District Administration

- ✓ CIS buildings
- ✓ Rural electrification

- ✓ Police buildings
- ✓ Administration buildings




These projects will become state assets that will have a long life and long term benefit to the community as a whole.


Each project will be assessed by the Office of Rural Development to ensure they are of real benefit, to the community and can be sustained over time.

All Open Members of our National Parliament are committed to ensuring that these Year 2000 District Development Program Grants are used wisely and are of true benefit to our local communities.

Yia 2000 districk divelopmen



program grant



Gavman bilong Papua Niugini i kirapim wok bilong kamapim rot bilong gutpela sindaun long wanwan distrik na divelopim na helpim long kirapim ol project inap long kamapim gutpela sindaun.

Wanwan Open Memba bilong Nesinol Palimen bilong yumi bai wok bung wantaim districk administreta long mekim wok painim-aut long wanem kain divelopmen project ol i laikim long eria bilong ol.

Gavman i brukim K89 million igo long 89-pela ilektorol distrik aninit long Yia 2000 Distrik Divelopmen Program. Opis bilong Rural Divelopmen bai lukautim ol projects Gavman i helpim long kirapim bilong helpim lokol komyuniti bilong yumi insait long olgeta wanwan Distrik bilong Papua Niugini.


Dispela em ol kain project Gavman bai helpim long kirapim long kamapim gutpela Rural Transport:

- ✓ Han rot
- ✓ Bris
- ✓ Liklik ples balus
- ✓ Wof



Dispela em ol kain project Gavman bai helpim long kirapim long kamapim gutpela Rural Helt sevis:

- ✓ Aid post na klinik
- ✓ Rural wara supply
- ✓ Haus bilong Helt wok manmeri




Dispela em ol kain project Gavman bai helpim long kirapim long kamapim gutpela Skul bilong helpim ol pikinini bilong yumi:

- ✓ Elementary na Primary klasrum
- ✓ Haus bilong tisa

Na dispela em ol kain project Gavman bai helpim long kirapim gutpela Distrik Opis (Administration) bilong yumi:

- ✓ CIS building
- ✓ Rural pawa supply
- ✓ Polis building
- ✓ Administresin building



Dispela ol project bai i kamap samting bilong Gavman na em bai istap longpela taim na givim helpim long olgeta pipol long komyuniti

Opis bilong Rural Divelopmen bai skelim wanwan project na luksave gut bai em givim gutpela helpim igo long komyuniti na em bai istap longpela taim o nogat

Wanwan Open Memba bilong yumi long Nesinol Palimen bai lukluk gut long dispela Yia 2000 Distrik Divelopmen Program Grant igo long wanem project, hamas moni igo long dispela project na dispela project bai givim gutpela helpim tru igo long wanwan lokol komyuniti bilong yumi.

Lagani 2000

district hatubua program

heduru grant monidia



Papua New Guinea Gavamani ena laloa badana gunika dekenai noho taudia edia mauri hanamoa totona, hatubua gaukaradia, Grant moni dekenai durua do idia henia diba.

Ngāwhiri Parliament e hōia e ngā Membro o te Kōwhiri, pūnaha tōna i te kōwhiri o te māori, i te kōwhiri o te māori, i te kōwhiri o te māori, i te kōwhiri o te māori, i te kōwhiri o te māori.


Lagani 2000 ena District Hatubua Program i aonia 89 million kina be dala naasia. Papua New Guinea ena 89 electora district ibouia totona Rural Development Ofis ese mai gavamani ena hatubua gaukara heduru monia do ia hana bona ia gaukaradia Papua New Guinea ena district laonia taunimanimia ibounai heduru do idia davana noho mauri hanamoa totona.

Cotika gabu ta ta iardia: Rural Transport hatubua bona hanamoa gaukaradia moni dekenai durua do idia davana be hegeregere

- ✓ Motuka ena heau dala maragidia
- ✓ Sinavai amo hanai nese
- ✓ Peleini maragidia edia diho gabudia
- ✓ Sisima edia kamokau wafo

Health, Education, Natall, CIS, Motuka, Sinavai, Peleini

- ✓ Aid Post bona kiliniki maragidia
- ✓ Ranu abia vareai gunika gabu SLD dekenai
- ✓ Health gaukara taudia edia noho ruma haginidia totona



Natuda maragidia edia aonega abia dala hanamoa heduru be


- ✓ Elementary bona Primary sikuli rumadia
- ✓ Education lalonai gaukara taudia edia noho ruma danu haginia totona



Bona District Administration hanamoa be hegeregere inai gabu ta ta ena Kahahai

- ✓ CIS edia ruma hanamodia

- ✓ Paua abia vareai gunika gabu ta ta lalodiai
- ✓ Polis edia ruma hanamodia
- ✓ Gavamani ena Administration ruma haginidia



Inai hatubua gaukaradia iboudiai be gavamani ena kohu badadia, komiuniti lalonai taunimanimia iboudiai edia mauri do ia hatubua bona ia hanamoa lagani momo vairadiai.

Hatubua gaukara ta ta be Rural Development ena Ofis ese do ia itadia tao, bona do ia naridia bona regudia vaira lagani lalodiai.

Ise da Nesenol Parliament amo Open Membas edia gwauhamata badana be inai lagani 2000 ena District Development Program heduru monidia do idia gaukaralaidia maoro maoro bona momokani ai local kamiuniti lalodiai taunimanimia ibounai edia noho mauri hanamoa totona.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.